

DISCOVRS
DE LA NATVRE,
CAVSES, ET REMEDES,
tant curatifs que préseruatifs des
maladies populaires accōpagnées
de Dysenterie, & autres flus de
ventre, & familiaires aux saisons
chaudes & seiches des années de
semblable intemperature.

Composé par le Sieur CHARLES LE POIS
Conseiller & Medecin Ordinaire de son
ALTESSE, Doyen & Professeur en Me-
decine à l'Vniuersité du Pont-à-Mousson,
Seigneur de Champel, &c.



AV PONT-A-MOVSSON,

Par SEBASTIEN C RAMOISY, Imprimeur
Juré de son ALTESSE, & de l'Vniuersité.



A SON ALTESSE.



ONSEIGNEVR,

La singuliere debonnaireté de vostre ALTESSE d'une part, & l'assurance de quelque estime dont elle a accoustumé de favoriser le petit acquis en l'estude de Medecine, que les travaux & meditations cōtinuées de quarāte ans ença m'ont apporté d'autre part me donnent avec sa licence la hardiesse de commettre à la faveur de sa benigne protection, & sauuegarde de son autorité ce liuret, duquel ie fay present au publicq y ayant employé ce peu de iours des vacquāces anniuersaires de nos leçons publiques, & pressé tellement qu'il puisse venir à temps & lieu au souhait & grand besoing du peuple, si

qu'on n'en dist, après la mort le Medecin; la maladie populaire qui causa tant de desolations l'an passé ia nous tallonnant de près, & ses causes asprement instantes sur nos chefs. Car comme le subiect est serieux, graue, & plein d'une doctrine non triuiale, ains esloignée en partie du sentiment commun des Medecins vulgaires, certes il est vn digne obiect de l'enuie & partant a besoing d'un bon support. Mais outre ce que l'utilité le rend recommandable pour seruir de direction non seulement aux ieunes Medecins & leurs ministres qui sont pour le iourd'huy & les premiers & le plus souuent seuls appelez au secours des malades, voire aisez & moyenez, ains aussi de toute autre personne qui ayt la teste bien faicte (car au iugement de Galien tout homme prudent peut à soy mesme seruir de Medecin) & les fournir de bons conseils & remedes asseurez & approuuez des plus fameux Medecins tant anciens que modernes, & la methode

quant & quant d'en vser deuëment & à propos, si qu'ils puissent voire en la disette de Medecins, le nombre d'iceux ne pouuāt suffire à tant de milliers d'hommes esloignez des bonnes Villes, preuenir & soy munir contre l'incursion temeraire & traitresse des maladies imminentes, & rabbatre & emousser la pointe des presentes. D'ailleurs aussi recognoissant vostre ALTESSE comme bon Pere de la Patrie n'auoir riē plus cher que la santé & prosperité de son peuple (cuius salus suprema lex esse debet) & entendre avec un extreme ennuy regner vne maladie si pernicieuse & meurtriere, ie ne doibs & puis mettre en doute ce petit œuure deuoir estre agreable à vostre dite ALTESSE & ainsi hardimēt la supplier cōme ie le fay tres-humblement de l'honorer & annoblir de l'auen de sō authorité qu'elle a acquise par tout, non seulement pour estre heritiere de beaux & grands Duchez, mais par la re-cōmandation & merite d'un rare & ex-

quis iugemēt, d'un bō sens naturel, & d'un
 nelōgue experiēce, qui vous ont rendu par
 toute sorte de iustes tiltres Chef de vostre
 Conseil, pour ueoir seul ou au moins le pre-
 mier le fond de tous affaires à importance,
 uider & decider plus equitablement de
 toute difficulté en quelque matiere que ce
 soit, & heureusemēt aussi preueoir les eue-
 nements des choses humaines; si bien qu'à
 bon droit non seulemēt vos subiects loient
 Dieu d'estre regis d'un iuge si equitable &
 accompli, mais les voisins de pouuoir re-
 mettre à vostre sagesse la composition de
 leurs plus grāds differēts; & ainsi asseure-
 ment avec sa permission ie dōne à ce liure
 le nom & authorité de vostre ALTESSE
 pour passe-port & sauf-conduit, la sup-
 pliant en toute humilité me cōtinuer l'hon-
 neur de viure & mourir

De vostre ALTESSE

Tres-obeyffant & tres-humble vassal
 & seruiteur CHARLES LE POIS.



DISCOVRS

*DE LA NATURE, CAUSES,
& remedes tant curatifs que preser-
uatifs des maladies populaires accom-
pagnées de Dysenterie, & aultres flux
de Ventre, & familiaires aux saisons
chaudes & seiches des années de sem-
blable intemperature.*



LE premier & plus noble de-
voir de l'homme en ceste
vie mortelle, apres le culte
& seruice de Dieu pour lequel il est
né, & faict capable de sa beatitude;
consistant en vn aide, & mutuel se-
cours de la societé humaine, signam-
ment és necessités qui concernent
l'entretenement de la santé, comme
du bien le plus agreable que nous
puissions auoir ou mesme souhaiter

en terre, l'ay pensé sur l'aduis que j'ay eu ja pulluler la maladie populaire accompagnée de fascheux flux de ventre, qui l'an passé vniuersellemēt moissonna tant de corps, & motiué aussi par la soigneuse remarque l'intemperie de l'air presente estre non moins aspre & excessiue que lors (car il vaut mieux preuenir que d'estre preuenu & plaise à la souueraine misericorde de nostre bõ Dieu de destourner ce fleau, & rendre vaines mes apprehensions.) I'ay pensé dis-je estre obligé en conscience de minuter clairement, & succinctemēt quelque discours de la nature, causes, differences & effects, comme aussi de la preservation & guarison d'icelle, signamment en faueur de ceux qui ne peuuent cōmodément iouyr de la presence de bons & experimētés medecins (coniurant au reste tous ceux qui peuuent auoir l'assistance

ou conseil de medecin, s'y adresser & en prendre aduis, la guerre comme on dit se faisant à l'œil, & l'exercice de la medecine ayant pour obiect les indiuidus ou les hommes en particulier, duquel les liures ne traittent) & non aussi sans quelque esperance que ce mien labeur ne sera mesme inutile ou desagreable à ceux de ma robe, s'il est vray que plusieurs mesme des plus subtils & grands esprits ont ingenuëment & hautement confessé n'auoir peu encore bien sonder le fond de la maladie de questio, qu'ils treuueront Dieu aydant icy descouuert à pur & à plein par mes experiences, & considerations; pour auoir philosophé sur ce subiect serieusement depuis trente quatre ans en ça que i'en traite, & ne voy que trop frequentes au moins de quatre ans à autres, c'est à dire en toutes les années excessiuelement chaudes & seiches.

*Multa dies variusq; labor mutabilis æui
Rettulit in melius.*

Donc pour ne faire plus longue,
inutile, & ennuyeuse preface, & en
faueur des Doctes fonder quant &
quant solidement la doctrine qui
concerne la speculation de la nature,
& causes du present subiect, i'aduan-
ceray, & permettray quelques pro-
positions, lesquelles quoy que peut
estre nouuelles à ceux qui ne font
estat que de ce que l'antiquité nous a
laissé, ie me promets & requiers hum-
blement & raisonnablement me de-
uoir estre fauorablement accordées;
pour les auoir ailleurs demonstrees
& declairées plus au lōg & par viues
raisons euitant par ce moyen la pro-
lixité.

Premierement i'affiers que com-
me ainsi soit que le mot de fiebure
communement pris, signifie, & est
vne chaleureuse & seiche (ou au

moins de foy tendâte à feichereffe)
Intemperie du cœur & des esprits vi-
taux, & par conſequent de la maſſe
du ſang & de toute l'vniuerſité du
corps, à laquelle ceſt eſprit vital en-
flambé va inceſſammét ſ'immifcer,
& ainſi communiquer ſon feu & ar-
deur, intemperie au reſte contractée
pour la plus part par la contagion &
mellange des fumées & exhalaiſons
de meſme trempe ſuſcitées & eſle-
uées de quelque fouyer d'humeurs
pourries, ou embrasées, ou au moins
bouïllâtes quelque part que ce ſoit,
& laquelle enfin ſe faiçt paroïſtre
pour l'ordinaire tant par vne chaleur
demefurée & cuiſante au malade,
comme par vn dereiglement du
poulx, reſpiratió, & autres fonctions
naturelles, comme auſſi par le con-
cours de diuers accidents faſcheux,
difficiles, & ſouuent funeſtes : Com-
me ainſi ſoit, diſ-je, que ce mot de

fiébure communément touche toute l'vniuersité du corps, si est-ce que souuent se retrouue en quelque part ou reces d'iceluy vn foyer ou amas de sang & d'humeur, affectez comme dit est, les fumées duquel ne peuvent offécer ou distemperer le cœur sensiblement au moins és premiers iours, ains seulement au progrez, la pourriture ou exarsion ja fort aduancée & donnant vn grand incendie & feu clair. Ainsi en hyuer & en vieillesse les fiebures sôt fort obscures si elles ne sont de foyardentes & vehementes; en hyuer la froidure de l'air rabbatant l'intemperie communiquée par le foyer estranger au cœur; & en la vieillesse la froidure & siccité du cœur s'opposant à la mesme impression. Aussi le foyer crouissant en vne partie esloignée du cœur ou n'ayant point, ou bien peu d'arteres ne peut alterer prompte-

ment & manifestement le cœur, ny par consequent l'habitude du corps par le deffaut des vaisseaux, par lesquels se traittēt les vapeurs fiebureuses: si bien que quoy qu'en tel cas la personne nonobstant qu'elle porte en soy vn brasier allumé & fumant sans cesse, se puisse dire exempte, & franche de fiebure simplement ou absolument dite, si est-ce que veritablement elle est comme grosse d'une fiebure qui se dit non seulement fiebure ains avec adionction du nom de la partie, où croupit le foyer, comme qui diroit fiebure de la teste, fiebure du foye; qui est vne notable remarque du Sieur François de Valles.

*En son li-
ure de fe-
bris.*

Secondement ie demãde m'estre accordé, la matiere du foyer de la plus grand part des fiebures ou presque de toutes n'estre autre que le sang qui se retrouue és vaisseaux, soit

arteres, soit veines, & est d'ordinaire ou crud & pituiteux, ou bilieux & iceluy flaue ou atré & aduste : car le sang bien temperé entant qu'il est tel, n'est subiet de fiebure, & quel qu'il soit ou sincere & simple, *ἀκατον*, ou grandement fereux ou aqueux; car rarement les mucosites des intestins, & la sanie, mesme purulente engendrée de la corruption du sang ne prestēt le fouyer & matiere de fieure qu'en suite d'une premiere fiebure.

Je suppose en troisieme lieu que la masse du sang coulant par ses canaux & estant de foy & non au iugement des sens vn corps heterogene constant de plusieurs dissemblables substances ou humeurs, & ses conduits n'estans entre eux par tout continus, ains separez & faisant comme diuers arbres, du tronc desquelz sortent & poussent de petits reiectons

comme racines & fibres se dilatans par la substance ou corps de quelque viscere, & de l'autre extremité s'espandent plusieurs rameaux & branches aboutissâtes en diuerles parties; quelque affection estrangere que souffre ceste masse embrasement, pourriture, ou simple ebullition, elle ne la souffre tousiours en toute la totalité, c'est à dire en tous les arbres des veines voire ny en toute l'estendue d'un seul arbre si qu'elle conçoit en tout vne chaleur habituée ou, *in facto esse*, ains seulement tantost le *serum* seulement, tantost toute la masse cōprenant les quatre humeurs, tantost la seule partie aqueuse dite *Iehor*: & quelle elle soit, ores en plusieurs arbres tout ensemble, ores au seul tronc & racines, & ores aux rameaux, & quelquefois dans la substance mesme des parties ou aboutissent les racines, ou les rameaux: & aussi

qu'il y a grande difference de l'affection causant la fiebure, l'ebullition pourriture, ou adustion maintenant allant lentement & enuahissant *partem post partem* comme parlét les Philosophes, maintenant, bouillant à gros bouillons, & *clara dante incendia*.

En quatriesme lieu on me concedera la cause productrice, & imprimante cet excés de chaleur interne & immediate (pour laisser à part les externes & euidentes) consister principalement ez excrements fuligineux qui suscitez sans cesse par l'actiō de la chaleur vitale & influēte, signāment lors que la nature vacque à la digestion & perfection du sang, & supprimez pour lors par diuerses causes, & principalement à raison de l'inculcation, & immobilité de la mesme masse, pour sa trop grande plénitude, eschauffent de necessité ladite masse, & tant plus promptement
que

que le sang de soy est chaleureux & sec, ou mesme fereux, la grâde quantité des serositez estant le subiet ou l'occasiô de putrescibilité ou disposition à la putrefaction, comme enseignent les Peripateticiens & se voit clairement en la pourriture du vin, ou bien disposé à cette intemperie & ce par l'action continuelle, & longue de l'air ambient ou autre agent qui l'environne, l'air dis-ie qui eschauffé & brulé en la saison de l'esté imprime son ardeur à toute la masse & principalemēt à l'esprit vital. Mais quand aux causes mouuantes qui donnent le soudain, temeraire, & haut boüillon, au sang ia disposé par les causes susmentionnées, pour omettre les occasions qui dependent de nous & partant ne touchent tous les hommes en gros, ains en particulier, on ne me peut nier la plus commune, vniuerselle & necessaire au re-

ste, & ineuitable estre l'insigne & tumultuaire perturbation ou emotion du mesme air, laquelle arriue és quartiers de la lune & notables changements ou tempestes & orages causés signâment par les vents soiét chauds & humides de foy, comme l'Auton; soient froids & secs, comme l'Aquilon, qui par leur antiperistase ou soudaine, & forte impulsion poussent & pressent ladite masse vers ses fontaines & visceres, si que s'esuit vn estouffement & pourriture prompte & ineuitable.

Enfin ie demande qu'on me donne que toute faillie ou flux de sang, ou de quelconque autre humeur, soit symptomatique suruenât à l'étrée ou progrès de quelque maladie, soit critique, la terminant en quelque façon que ce soit, n'a autrement pour principe ou cause mouuâte la faculté expultrice de l'ame vegetante, ains plu-

stot vn haut boüillon extraordinaire & vehement conceu en la matiere febrile, c'est à dire au sang mal ventilé & destitué de rafraichissement quelque part que ce soit, par laquelle les parties heterogenées d'iceluy se separent, escument, & cherchent issue se iectants à quartier çà & là tandis que l'ebullition, & fermentatiõ dure, voire iusqu'aux extremités des vaisseaux aboutissans hors de la circonference du corps, ou à la concauité des parties ouuertes en dehors, comme les intestins, si bien que nulle fluxion ou mouuement d'humeurs se fait soit sur quelque partie ou les veines aboutissent, comme iointures, soit hors du pourpris & enceinte du corps, quil n'y ait quelque ferueur au prealable separāt & vomissant loing du foyer les parties du corps boüillonnant & non seulement les confuses, ains mesme les exactement vnies & intimes.

Ces propositions donc comme bases du discours suiuant ainsi establies & proiettees, ie dis & afferme la maladie populaire qui regna si cruellement l'an passé, & nous menace à l'aduenir, si Dieu par sa misericorde ne nous preserue, n'estre autre qu'une fiebure, le foyer de laquelle est la masse du sang sur-abondante ez visceres esloignez du cœur, & nommément au foye laquelle masse ja distemperée, & de longue-main ja disposée à chaleur & seicheresse par l'ardeur principalement de l'esté, & tout à coup conceuant vn bouillon ou ferueur soudaine & vehemente par l'emotion du mesme agent & notables changements & tempestes d'iceluy escume ses parties plus aqueuses par les veines meseraiques & ainsi traine quant & soy vn extraordinaire flux de ventre non sans douleur, & estreintes.

I'appelle donc en premier lieu la maladie proposée, fièvre. Car comme ainsi soit qu'en plusieurs malades la fièvre comme maladie vniuerselle les premiers iours ne soit sensible & euidente par ses ordinaires symptomes à sçauoir excessiue & cuisante chaleur de toute ou de la plus part de l'habitude du corps & par le dereglement du pouls & respiration comme aussi par la deprauation des fonctions naturelles, si est-ce qu'il y couuet tousiours vne fièvre quoy que obscure & particuliere causée d'un boüillon de sang au foye ou voisinage, car iamais ny les serosités, ny les ichœurs ou sanies de la masse, que nous voyons teindre & rougir ce flux, ne peuuent se separer, exprimer & se ietter dans les intestins, que par la force d'une tumultuaire ebullition du sang, cause continente de toute sorte de fièvre vniuersel-

le ou particuliere, laquelle ebullitiō ne se pouuant faire sans la communication des vapeurs chaudes portées au cœur, de necessité ceste fieure particuliere est bien tost suiuied'vne generale ou fieure absoluëment dite, si cen'est que la quantité du sang soit fort modérée, & la cause mouuante foible, & le foyer contenu seulement en la partie concaue du foye & rameaux de la veine porte: autrement au concours des causes contraires, à sçauoir le foye estant surchargé tant en son pourpris entier ou en sa partie conuexe, ou bien la pourriture & flamme de la partie concaue se dilatant par propagation aux racines de la grand' veine caue & substance mesme du foye, lors certes la fieure particuliere, deuient vniuerselle: la raison au reste pour laquelle la fieure demeurant particuliere est obscure & comme imper-

ceptible durant tout son cours, ou au moins au premier quartier voire mesme au iugement des Medecins, nous l'auons par cy deuant touchée à sçauoir que le foye & principalement & premierement sa partie enfoncée & interne est le siége de ceste fieure pour les raisons cy apres à deduire, & l'anatomie de plus nous enseignant ladite partie ne receuoir en sa composition aucunes arteres, par lesquels se puissent eslancer librement les fumées du foye iusques au cœur, qui le puissent alterer & imprimer vn excès de chaleur contre nature, & mesme la partie ronde ou externe n'en receuoir que bien peu & fort petites, necessairement la fieure reste tres-obscurc & ne se met en euidence pour ne tirer encore en sympathie le cœur, & ny par consequent toute l'vniuersité du corps cela estât tres-aueré que iamais la fieure n'est

vniuerselle que le cœur & la chaleur vitale ne soient distemperez.

Commençons donc desormais à estendre d'ordre & par le menu les preuues de toutes les parties de nostre proposition generale que nous venons d'auancer comprenant toutes les causes de la maladie de questiō, & en premier lieu quant à la cause materielle, ie voy communément les Medecins d'une commune voix la rapporter à quelque espece de cacochymie & signammét pituiteuse, ou bilieuse, & quant à la premiere, la tirer partie du mesentere, ou premiere region, c'est à dire du ventricule & intestins, partie du cerueau, desquelles l'une & l'autre pour sa qualité salugineuse & acre a faculté de ratifier la mucosité enduite, & écroulée aux parois des intestins, ains ronger les veines, & substance d'iceux & ainsi rendre les deiections teintes de

crueur & de sang: mais ils me pardonneront s'ils leur plaist, & aduoüeront que les plus frequentes deiections en ces maladies populaires, sont partie sereuses, ou aqueuses, pailles, ou iannes tout à fait, partie cruentes, c'est à dire d'un sang non fibreux & soy figeant ou cailbotant aucunement, ains sanieux & decoulant non seulement goutte à goutte, ains largement & profusément, pur au reste & non meflangé ou confus avec autres humeurs ou excrements communs; partie & au progrès d'une humeur de haulte couleur iaune, ou verd ou atre, & de consistance crasse, & visqueuse, mais au reste teinte de quelque peu de sang (car ie ne parle point des deiections qui sur la fin ou au moins la maladie ja bien aduancée se retrouuent du tout purulentes) & de plus quelles elles soient, bilieuses ou cruentes, elles sont aucunement

parcelles , & comme l'escume de la masse du sang qui de foy pourrie, ard ou boult & ainsi escume largement hors mesme les canaux , & cause le flux desbordé : si que la fièvre n'a pour sa cause continente vne humeur simple, ainsi que le commun pense , ains la masse de sang telle qu'elle se retrouue sur-abondante en quelque viscere, exemple au foye, & icelle *ex prædominio* s'escuse ou synce-re, & cruë, ou ja excedente en sa naturelle temperature, sçauoir bilieuse, flaue, ou aduste, & la raison de cecy a esté insinuée par cy deuant à sçauoir que les parties heterogenées du sang estant vnies ou au moins confuses entre elles ne se separent autrement que par vne ebullition ou pourriture prealable. Si donc nous voyons en la maladie de question les parties du sang se ietter & regorger mesme hors du corps par les intestins, & que

de neceſſité premieremēt ils viennent & trauerſent par les veines meſeraiques qui ſont rameaux de la Porte implantez en la concavité du foye, nous deuons en fuite conclure le ſang furnageant au foye & par la ferueur & haut bouillon ſe diſſouldant en ſes parties & humeurs (matiere du flux) eſtre la cauſe continente & ſubiect de ceſte fieure populaire.

Ce que confirme l'experience qui m'apprend pour l'ordinaire tel flux proceder en telle maniere, à ſçauoir i'obſerue és premiers iours les deiections totalement aqueuſes & vn peu paſſes, & puis au progrès ou ſanglantes & ſanieuſes, comme i'ay dict, ne ſe figeant touteſois & caillant ce ſang, ou bien bilieuſes rehauffantes peu à peu leur couleur iuſques à l'airugineuſe, ou atre, & pareillement ſ'eſpeſſiſſantes & rendantes de iour à autre plus viſqueuſes. Par lequel pro-

grés se monstre manifestement telles humeurs n'auoir croupi auant la maladie, ains auoir esté engendrées d'heure à autre & exprimées par le bullition ou assation du sang, & selon les degrés de l'une ou l'autre rehausser en couleur & acquerir vne consistence plus tenace & forte. Car, comme nous auons ja remarqué vne fois ou deux, le commencement de la ferueur du sang separe premieremēt les eaux confuses, & de là la sanie, laquelle aussi peu à peu s'augmentant la ferueur se conuertit ou en pus, ou en bile de diuerses especes selon l'auancemēt ou impression plus grāde: de quoy faiēt foy par exemple l'inflammatio des yeux que nous voyōs premieremēt pleurer quelques heures ou iours mesme auant que ietter de la matiere soit purulente, soit ichoreuse; & particulieremēt le sang, qui regorge des veines meseraiques,

estant parcelle du foyer donne toute assurance de nostre opinion: car iceluy est entierement fanieux non fibreux, c'est à dire putride suiuant le dire d'Aristote, puis qu'il ne se caillote aucunemēt, estāt chose au reste tres-notoire ne se retrouver aucune cauité notable au foye ou les humeurs que nous voyons reiettées en telle quātité puissent auoir seiourné, & mesme le ciste cholidoque n'estre capable de si admirable quantité de bile que no⁹ voyōs reuomie soit haut soit bas, iusques à quelques liures mesme durant vn mois lunaire entier que nos flux durent. Concluons donc pour ce chef la matiere conioincte de nostre fieure accompagnée de flux de ventre estre la masse du sang telle qu'elle se retrouve es veines du foye principalemēt, qui se corrompant & escumant ses parcelles, traine & entretient ce flux si importun.

*Au quatriesme
des Me-
theor.*

- Car il n'y a que tenir que le sang contenu en la ratelle peut aussi bien fournir de matiere à ceste maladie; mais toutefois à dire vray plus rarement eu esgard à la démesurée quantité des humeurs regorgeantes par ce flus, de laquelle quantité la ratte ne peut estre capable, & de ceste doctrine ie tire encor vn autre argument bien preignant de ce que nous ne voyons les Hæmorrhoides internes fluer & s'enfler ou douloir: ce qui arriueroit sans doute, si la matiere du flus partoist & escumoit du sang boüillant en la ratelle.

Quand au secôd article de nostre proposition, auquel nous maintenôs le siege où reside le fouyer de ceste fieure estre particulièrement le foye, & nommément la partie d'iceluy interne où est planté le tronc de la Porte, j'en ay plusieurs necessaires & tres-clairs arguments, & premierement

l'experience m'enseigne, presque toutes, ou la plus grande part des fieures prendre leur premier origine en ce siege, tant par ce que le sang est là plus impur, aqueux, indigeste, & moins elabouré, & de plus fort pressé en des vaisseaux tres-estroits destitués de la compagnie des arteres : & aussi ce viscere est beaucoup esloigné de la circonference du corps, & par ainsi le sang y est peu, ou point, eschauffé de l'influence de la chaleur vitale, ny rafraichy de l'air ambient, & partant par toute raison exposé a pourriture: comme aussi & principalement à raison de la propension & inclination naturelle que le sang à vers sa source & fontaine en toutes les occasions, qu'il est repoussé au dedans soit de son mouuement naturel suiuant l'agitation de l'esprit vital, signamment és perturbations de l'ame, ou par quelque autre cause,

comme la presence de la froidure externe, & par ainsi il demeure estouffé en ses veines. Certes l'experience journaliere m'apprend presque toutes sortes de fieure auoir là leur siege les premiers iours; & mesme les fieures qui suiuent & dependent des inflammations du *thorax* comme pleuresie, pulmonie, & semblables qui suiuent vn hault & violent boüillon du sang eschauffé & escumant en hault par la caue ascendante & *azygos*, comme l'insinuë manifestement le vomissemēt de bile qui souvent adhere & tient compagnie à telles douleurs és deux ou trois premiers iours suiuit ma soigneuse observation, car le vomissement atteste euidemment la perturbation & ferveur du sang, de laquelle la faillie de bile est tres-assuré effect & indice. Si donc du foye presque toute autre sorte de fieure sourd & prend son
com-

commencemēt, certes il est fort vray semblable la nostre y estre ancrée.

Et aussi nécessaire si nous nous souuenons la matiere coniointe de la maladie proposée estre le sang, & les humeurs causantes le flux de ventre estre l'escume d'iceluy soit serositez, soit ichœurs cruentes, soit bile : car le foye du consentement de toutes les escolles est l'officine & fontaine tant de la masse du sang que de la bile ; & de plus c'est chose très-assurée les parcelles, & l'escume du foyer venir & decouler seulement du foye par les veines mēseraiques, qui estants rameaux de la Porte se terminent dans le parenchymē du foye, estant tres-difficile le sang contenu és veines de ce tronc venir de plus loing ; & d'en hault & ce pour la petitesse d'icelles & des anastomoses communes aux vñes & aux autres racines des deux troncs ; combiē que

la flamme & pourriture se puisse communiquer aisément.

ib. de
limento.

Je ne veux nier toutesfois que; comme tout le corps est transpirable seló le dire d'Hippocrate, toute l'habitude d'iceluy quelquefois se peut descharger par le foye & ventre haut & bas par vne furieuse ebullition qui apporte le felon; ou *morbum choleram*. Mais ie n'apperçoy que rarement tel desbordement arriuer qui est suiuy ou plustost accompagné d'une soudaine & extreme extenuation qui se faiet reëognoistre par la face d'Hippocrate dans le troisieme iour, quoy qu'enon mortelle, comme i'ay obserué iadis en deux ou trois, à sçauoir au sieur Bodin professeur d'icy lorsqu'il estoit encoré ieune, & en ma fille Catherine aagée seulement de deux ou trois ans, & de frëschẽ memoire en vn escolier duquel ie parleray cy apres. Car ces années dernieres à la

verité ie ne me souuiën de flux si precipité & desbordé qu'ez susmentionnez.

Ores cest argument prouue spécialement la partie concaue du viscere mentionné plustost que la conuexe estre interessée en la maladie de question, lequel argument prend force de ce que nous ne voyons iamais, ou au moins qu'il me souuienne, ou i'aye remarqué iusques icy, nostre flux quoy que grand & desordonné atteindre ou passer par les hæmorrhoides externes, qui sont rameaux de la caue descendente. Car delà ie conclus le sang escumant en ce flux ne venir ou prendre son cours par la partie conuexe du foye, ains de l'interne & par la porte, & par embas comme de sa source, & ce pour la pesanteur de l'humour *ex prædominio* aqueuse: Car ie ne parle icy des flux de ventre qui sont causez de la seule

pituite soit particuliere aux intestins, soit tombante de la teste, qui pour sa nitrosité ratisse & vlcere les intestins, teint vn peu les deiections; mais des flux plus frequens qui sont grandement sanieus & cruentés, ou bilieux du tout & accompagnés au reste de fieure mais plus ou moins euidente & dangereuse; lesquels ie maintien ne venir plus de loing que du foye, & ce viscere estre siege de la fieure, & pour la plus part la partie d'iceluy concaue.

Et de ceste doctrine vn autre argument bien preignant se peut tirer des vomissements, nausées, rapports, hoquets & sanglots, & mesme iaunisse; tous lesquels symptomes i'ay remarqué signamment les premiers estre familiars, & tenir bonne compagnie à nostre maladie; car les sanglots ie n'en ay veu que des funestes pour la plus-part comme és Sieurs

Pariset Greffier de la chambre des Comptes & Madamoiselle Gallon sont vingt cinq ans enuiron ; & de la iaunisse ie n'en ay souuenance que d'autant, à sçauoir du sieur Barnet gouuerneur des salines de Dieuze malade de nostre maladie y a enuiron trente deux ans, c'est à dire l'année du siege de Paris & prinse de Marsale qui fust extraordinairement chaude & seiche : & de cest escolier Allemad & seminariste d'icy mentionné n'a gueres nommé Maillard, qui y a vn mois eut vne insigne fieure accompagnée d'un extreme desbordement de bile, de sanglots, cardialgie, iaunisse, & face d'Hippocrate, toutes fois fust guaray par la grace de Dieu outre l'opinion d'un chacun dans l'onzième. Aufquels accidents nous deuons adiouster vn extresme degoust & principalement de toutes sortes de chair, & iceluy conioint à

vne irremediable soif, au cas que la langue & palais ne soient arrousez par quelque fluxion d'eau tombante de la teste. Ores est-il que chascun sçait tous les symptomes que dessus se deuoir resoudre & rapporter au foye, comme à leur source premiere, & auquel l'estomach compatit de necessité, ce qu'il n'est besoing de declarer plus amplement à ceux qui sont imbus des principes de l'art, & qui sçauent aussi bien que moy le foye estre le siege de l'appetit, & aussi la source des serosités bilieuses qu'il degorge & vomit en nostre maladie tant sur l'orifice de l'estomach qu'en toute l'habitude du corps, & ainsi apporte le degoust, alteration, nausée, sanglots, vomissements, & iaunisse, combien que les sanglots partie se puissent rapporter à la tumeur du foye pressante l'estomach, laquelle tumeur suruiuent, & s'augmente par

la propagation de la pourriture contenue premierement en la partie concaue & s'espandant à la conuexe, la violence de la ferueur escumant les humeurs & serosités bilieuses ou mesme sanieuses, & ce par les anastomoses communes des racines de la porte aux racines de la caue, & mesme au parenchyme ou substance du foye, les pores d'iceluy lors amplifiez par la chaleur; laquelle propagation se confirme aussi par le concours d'autres symptomes qui suruiennent pareillement, le mal & fièvre allant s'augmentant & empirant, & qui par consequent prouent infailliblement le siege de nostre maladie estre le foye, à sçauoir le sentimēt d'un poids extraordinaire au reprendre l'haleine à l'endroit du xifoeide & assiete du foye avec difficulté de respirer, & sur tout vne distention & dureté manifeste de l'hypochondre droit à

l'endroit susmentionné. Car sans doute ceste difficulté de respirer ne peut estre reietée qu'à vne oppression du diaphragme causée par la tumeur du foye : laquelle tumeur mesme à la longue s'estend dans toute la capacité du ventre qui s'enfle & grossit démesurément, la fièvre tirant en longueur; Argument certain d'obstruction ou plustost constipation des vaisseaux de ce viscere apportée par l'insigne tumeur du propre corps d'iceluy, s'il n'en faut plustost accuser la grande intemperance au boire. Si tant est donc que la syndrome de tous ces symptomes susmentionnez propres aux parties qui ont vne estroite conionction & sympathie avec le foye, & nommément l'estomach & diaphragme auquel ce viscere est connexe tant par ses vaisseaux, que par sa situation, est compagne inseparable de la maladie

proposée, il n'y a doute aucune icelle estre renfermée au pourpris de ce viscere.

Bien que de plus nous remarquons en nostre maladie l'absence & priuation des symptomes ordinaires & familiars aux fieures encloses au *thorax* & à la teste, exēple de douleur & pesanteur de teste, assoupissement des sens, refuerie, douleur de costé, & grande difficulté de respirer : Et certes ie n'en ay veu mourir qu'avec le iugement sain & entier.

Enfin nous adiouterons vn tres preignant argument qui se tire de l'vrine; car pour le commencement, & tandis que le foyer ne passe la partie interne, l'vrine est tenuë & aqueuse du tout, ou plustost pour dire vray saine & naturelle : mais le mal croissant & sauauçant en la partie externe, lors l'vrine se trouble & deuiet crasse. Raison de ce est que le sang boiil-

lant au premier quartier escume seulement la serosité és rameaux de la porte, & ainsi l'vrine ne préd aucune teinture extraordinaire, comme elle faißt depuis, quād le feu s'allume aux racines de la caue & la pourriture augmentant descharge les sanies aux grandes veines de la caue & principalement és emulgentes voisines. Concluons donc nostre fieure populaire auoir son fouyer en la masse du sang embrasé ou pourry au foye, & quelquefois coniointe avec vn flegmon, ou tumeur inflammatoire d'iceluy.

Mais c'est assés meshuy discours & de la matiere, & de la partie mal-affectée de la maladie de question. Venons maintenant aux causes efficients & mouuantes, comme aussi à la disposition du subiect capable d'icelle, puisque la fieure est vne excessiue qualité imprimée par vne al-

teration & mouuement de quelque cause qui de soy actuellement chaleureuse communique son feu & chaleur estragere à la masse du sang, & que d'ailleurs nulle cause efficiente agit cōtre aucun sujet qui ne soit disposé au prealable & capable de recevoir ce mouuement. Donc touchāt les causes efficiētes, cōme ainsi soit qu'elles se puissent ou doiuent rapporter suiuant la doctrine de Galien à cinq Lib. 1. de feb. & de morb. caus. chefs que le temps ne me permet de deduire par le menu, si est-ce que comme ceste maladie est commune & populaire, à la verité aussi la cause doit estre commune & qui puisse toucher indifferemment toute sorte de personnes. Or est il qu'entre les choses d'vsage commun ne s'en retrouuent point de plus puissantes & actiues que l'air ou l'eau & viure. Je sçay que communement on accuse les fruiçts desquels les hommes en

ceste saison seconde d'iceux s'engorgent & s'éplissent tant par leur abondance & bon marché comme pour la douceur & rafraichissement qu'ils en tirent durant les ardeurs de l'esté & seicheresse de l'automne. Mais combien que l'on les puisse blasmer comme disposants les corps & masse du sang à pourriture, à raison qu'ils augmentent l'impurité sereuse, qui est l'occasion de la disposition à putrefaction du sang, comme nous auons insinué cy dessus, si est-ce que les fruiets ne peuuent tenir rang és causes alterantes & dōnantes au sang le hault bouillon & ferueur en laquelle consiste l'essence de la fieure. Et pour le reste du viure on pouroit avec raison accuser le vin, comme aussi la chair, & les tenir sinon pour causes mouuātes, & actiues, au moins pour dispositiues. Mais ces choses sont trop restreintes, particulieres, &

d'une action trop lente, foible, & tardive.

Et quant à l'air, nous l'en pouvons & devons iustement accuser avec nostre Hippocrate en plusieurs lieux & disertement és aphorismes; & ce pour trois raisons, & moyens par lesquels il agit, & altere le sang de toute personne indifferemment; Car premierement excédant en chaleur par vne longue, instante, & continuée action il enflamme peu à peu non seulement les esprits vitaux avec le cœur, ains toute la masse du sang, & ainsi le dispose à fièvre. Secondement és notables mutatiōs de temps qui arriuent soudainement és quartiers de la lune & souleuement des vents, il émeut, agite, & donne vn extraordinaire bouillon à l'vn & l'autre, & excite soudain la fièvre. Tiercement le mesme air par vne cōtraire action dispose à ferueur & pourriture le

sang à sçauoir le repoussant brusquement & le pressant par vne froidurè tèméraire & gaillarde occasionnée par la tumultuaire incursion des aquilons froids & secs succedants aux vents meridionaux & occidentaux. Car le sang fuyant le mouuement de l'esprit vital fuyant la rencontre de son ennemy se retire aussi prôptement aux visceres comme à la source, se presse & foule tellement, que priué du benëfice de transpiration s'estouffe & par la suppression des excrements fuligineux peu à peu s'eschauffe, où conçoit vne insigne ferueur qui porte la fieure par tout. Et à la verité comme nous respirons, & transpirons sans cesse l'air circonfus, qui est au restela seule matiere de l'esprit vital, & s'immisce totalement à la masse du sang, il n'est à douter l'air estre tres-puissant à alterer ceste masse, soit en luy com-

municant sa propre chaleur, soit par accident, tant la repoussant au dedans & empeschant la transpiration par la condensation du cuir, que la retenant & figeant dans ses veines, principalement si cest effort dure quelque temps notable & rencontre vn corps plein & chargé de cuisine.

Je suppose au reste entre les causes internes, & non euidentes de fievre la quantité des susmentionnées exhalaisons, (la generatiõ desquelles comme aussi le meilange avec la masse du sang est ineuitable) auoir le premier lieu comme estants de nature ignée & actuellement chaude si qu'à bon droit les Medecins de leur suppression repetent l'origine de toute fievre putride, qui n'auroit fondement es causes externes, à sçauoir quelque vehemente perturbation de l'ame, demesuré exercice du corps, insolation & semblables.

Et de cecy pour conclurre nostre denombrement particulier des causes de fieure, & ne nous estendre en vn general & enuoyeux discours d'icelles nous tirerons de plus vne conclusion particuliere de la qualite & disposition du corps susceptible de fieure, à sçauoir icelle consister principalement en vne grãde plénitude de sang, soit *ad vasa*, soit *ad vires*. Car l'vne & l'autre de necessité est accompagnée d'vn grand amas de vapeurs fuligineuses, à raison duquel la masse du sang insensiblement s'eschauffe, & corrompt, si que l'apparat d'vn corps à fieure le plus prochain est la grãde surcharge, & abondance du sang, qui le rend immobile & destitué du benefice de transpiration. Rebroussons donc nostre chemin, & parcourants les causes tant efficientes & mouuantes, que dispositiues de la maladie proposée donnons

nons à chacune quelque lumière & preuue, pour fatisfaire aux plus curieux qui ne donnent rien gratis ; Et aussi pour ne m'esloigner de ma coutume ordinaire d'enseigner ne m'arogeât tant d'autorité que ie vueille qu'on m'oëtroye rien à credit & sans raison, à laquelle on puisse iustement acquiescer & s'en contenter.

Je dis donc la principale cause efficiente estre l'air intemperé en chaleur, & non les fruiets contre l'opinion du vulgaire, & mesme de quelques Medecins les blasmans mais à tort, si ce n'est pour la raison que i'ay touchée, à sçauoir qu'ils rendent le sang disposé à pourriture pour leur humidité superflue, outre ce qu'ils tiennent le ventre par trop gay pour purger aucunement la bile & relaxer le ton des intestins. Mais comme cause efficiente nul ne les peut reprêdre raisonnablement qui

les considerera estre de nature froide humide, & de substance aqueuse & ainsi rafraischir substituants & fournissants vn sang humide & froid, comme aussi à la verité ils nous sont estlargis par la liberalité diuine pour le rafraischissement du sang. Et de fait qui n'a remarqué avec moy ces fieures & flux de ventre de question regner souuent en esté & arriere saison és années, esquelles ne se retrouuent aucuns fruiçts, ou courir sus plusieurs qui n'en ont goûté aucunement; & au contraire plusieurs s'en creuer, & nonobstant viure francs & libres de telles maladies. Si que ne les pouuans rapporter aux fruiçts, & moins aux autres especes de viure, à iuste raison nous en reiettons la cause à l'iniure de l'air, comme cause commune & grandement actiue.

Et pour confirmer l'intemperie de l'air en estre la vraye, & vniue

cause efficiente, & premierement par son ardeur, i'en appelle à tesmoing tous les Medecins qui auoüeront auoir obserué avec moy toutes les années chaudes & seiches excessiue-ment foisonner grandement en nostre maladie l'esté & l'arriere-saison, signamment s'ils ont suiuy vn long & aspre hyuer. Certes depuis trente & quelques années au delà que ie hante avec les malades i'ay tousiours soigneusement remarqué ceste verité.

Secondement le mesme air non seulement disposer peu à peu le corps à nostre maladie par vne lente adu-
stion & inflammation tant des esprits vitaux que de la masse du sang : Mais aussi mettre le feu tout à coup & donner le hault boüillon qui cause la fièvre comme *in actu secundo* & non seulement *in primo*, quand elle demeure encore insensible, la raison le

monstre clairement, & l'experience le confirme. Car la Philosophie nous apprend, comme i'ay particuliere-
ment & bien au long expliqué en mon miroir de la Comete, l'air auoir diuers mouuements & entre autres vn perpetuel & spiral fuiuant le rapt & mouuement du firmament; lequel estant trauersé & confus par les temeraires mouuements & hurts des vents differents & contraires s'entre-choquants, telle tempeste reuolte & agite tumultuairement tous les corps humides, tant grands (côme l'ocean mesme) que petits, & principallement le sang & esprits es animaux, & la semence mesme, l'experience iournaliere tesmoignant l'ebullitiõ & mouuement de ceste ey accõpagné d'effusion & flux quoy qu'involontaire au celibat, & d'importune tentige ou bandage des parties de la generation en vn autre estat, estre vn tres. assüré

prognostique d'une future tempeste
voire dans vn iour naturel apres.
Mais sur tout les maladies dites luna-
tiques & toutes autres causées de flu-
xion d'humeurs retournant periodi-
quement & s'augmentant en tous les
changements notables, & souleue-
ments de l'air quel il soit; & particu-
lièrement ie l'ay remarqué attenti-
uement l'an passé en nostre maladie,
icelle ayant ou couru sus tous les ma-
lades en tel mouuement, ou deterio-
ré grandement, & nommément au
Sieur des Combles, auquel i'obser-
uay dès l'onzième la fièvre aller s'al-
lentissant & le flux du tout cesser, voi-
re les vrines sur le quatorzième don-
ner signe de coction parfaite : mais
toutesfois suruenant enuiron le dix-
septième de la maladie, qui cōcourut
au vingt deuxième de Septembre,
apres vn rafraichissement de deux
iours vn grand & soudain *æstus* & ar-

deur estouffée, la fieure & flux redoubler tellemēt que le sang s'estant ictté par vn desbordé & furieux bouïllon dans la substance mesme du foye y causant vn flegmon, il fut nonobstant tous remedes dans le sixiesme iour de l'exacerbation emporté.

Car quand à l'action contraire du mesme air contre le sang qu'il eschauffe pareillement par l'antiperistase de sa froidure, Certes la tourbe de tant de maladies, comme pleuresie, pulmonie, flux de ventre, fieures mesmes ardentes & semblables, qui regnent & durent tout l'hyuer (car ie n'en voy point guarir durant l'inclemence d'iceluy) me sont bons garants le sang s'eschauffer & peu à peu bruster par ce moyen. Et certes ie tiens en la plus part des subiets de nostre maladie l'an passé le sang auoir esté grandement disposé à ceste in-

temperie par la rigueur, & longueur de l'hyuer precedent, si qu'on ne doit s'estonner l'esté ayant trouué à demy rostie la masse du sang, l'auoir bien tost acheué de griser & brusler, & ainsi foisonné en icelle maladie.

Quant au reste l'apparat à la mesme indisposition estre principalement fondé en vne grande plénitude de sang & signamment bilieux, i'en appelle pour tesmoins les hommes de complexion chaude humide, de bon point, rousseaux & hauts en couleur, les adolescens parfaits & menants vne vie sedentaire, comme religieux reformez, & estudiants, en vn mot toutes les gens de bonne chere, qui ont esté sur tous maltraitez de nostre maladie. Car en tous ceux cy indubitablement surabonde la plénitude de sang, de soy chaud & coniointe à la pleonexie fereuse, c'est à sçauoir en la complexion &

aage, comme aussi en l'institution de vie susdite, pour exceller en icelles les principes & causes tant efficientes que materielles de la generation du sang, comme aussi manquer les causes qui le puissent consumer, & digérer. Au contraire ie n'ay ouy parler que de bien peu de femmes atteintes de ce mal, pour estre la plus grand part affranchies de notable plethore pour raisons contraires, & signamment par le benefice des purgations menstruelles.

Iusques icy nous auons suffisamment traité de l'essence, & causes de toute espee de nostre maladie, desquelles se peuuent & doiuent tirer les differences variantes la cure & fournissantes indication differente; & ce pour l'instruction des ieunes Medecins en faueur desquels principalement i'ay iusques icy dilaté si exactement & punctuellemēt le dis-

cours que dessus pour ne se retrouver en nos liures praticiens qui ont la vogue. Les differences donc se doivent prendre tant de la fieure que de la matiere du flux, & pour celles de la fieure (pour laisser les generales, & communes à toute fieure) nous les prendrons & de la quantité, & des causes, à sçauoir de la diuersité du foyer & de l'espece de l'humeur peccante, lesquelles dernieres toutes-fois semblent coincider avec les differences de la matiere de flux. Car de vray les mesmes parties du sang qui sont le principal & propre subiect de la pourriture, sont celles mesmes qui escument dans les intestins. Mais pour les mesler ensemble eu égard à la briefueté & aussi cōme de fait elles se rencontrent, ie recognoy par experience les fieures qui sont moderées ou obscures & de soy fort petites auoir leur siege ou seulement es raci-

nes de l'un ou l'autre tronc des veines, & signamment de la porte. Mais les grandes & fort sensibles auoir leur siege en toutes deux & principalement de la caue, & aussi en la substance du foye ou parenchyme conioinctement aux veines. Et de plus les moderées & insensibles auoir pour matiere ou tantost les serosités seules, ou bien meflangées de bile passe, tantost quelque espeece de pituite, soit eau lente de la teste, soit mucosité des intestins, tantost la masse entiere du sang. Ainsi le flux est non seulement sereux, ains sanieux ou fort bilieux, ou purulent, ou pituiteux; & soit bilieux, soit pituiteux, iceluy estre tantost sincere, tantost teint & meflé ores avec graisse, ores avec sang pur, mais en differente quantité. Car à la verité j'ay remarqué de tout temps és premieres froidures de l'arriere-saison lors que les

feuilles cōmencent à tōber, & principalement lors que le vespre & le commencement des nuitées tient encore de l'ardeur de la canicule, & les matinées sont fresches, ou desia froides, si que l'on neglige de dormir couuert raisonnablement, lors regner les flux aqueux sans ressentiment toutesfois de chaleur excessiue qu'on puisse appeller fieure. Mais es corps plus replets j'ay obserué la pluspart des flux, quand aux pituiteux & visqueux, iceux suiure la fieure bien mediocre, & au reste soit qu'ils viennent de la teste, soit qu'ils prennent leur origine des intestins & peut estre du Mesentere, iceluy estre à la lōgue teint d'un peu de sang floride & beau, & par apres suiuy d'un peu de pus, de sang dis-ie coulant à raison de l'excoriation causée de ceste humeur falsugineuse ratissante. Mais pour ceux qui sont accompa-

gnés de fieure notable soit qu'elle se manifeste dès le premier iour, soit que seulement sur le quatriesme, ou septiesme, pour la pluspart ils sont ou sanieux, ou grandement purulents, ou bilieux du tout & de diuerses especes, iaune, orangée, isabelle, erugineuse ou mesme atre, & teints au reste de peu de sang, & enfin de pus. Car l'an passé ie l'ay remarqué pour la plus part, ou du tout sanieux, c'est à dire de sang ichoreux, putride, & ne se caillant, ou grandement purulent, ce pus estant engendré par la corruption du sang retenu en quantité és vaisseaux du mesentere, ou entre les tuniques des intestins és ieunes gens principalemēt, comme au fleur de Mondoré, en vn mien nepueu Pierre le Pois aagé de douze à treize ans estudiant, & en vn autre Bourguignon nommé le Clerc de Chastillon pareillement escollier vn peu

plus aagé. Ce que mesme i'ay obserué
ya enuiron vingt six ans au sieur de S.
Balmon Seneschal aagé de soixante
& quinze ans qui rendit durant plu-
sieurs mois tous les iours deux es-
cuelles & plus de pus tout formé, &
releua toutesfois de ceste maladie.

Mais nous auons desia touché vne
fois ou deux ces differences, con-
uiendroit maintenant parler des si-
gnes, mais comme nous en auons
parlé amplement en la deduction
des causes, & que de soy la matiere
du flux est sensible, ie couperay court
pour passer aux prognostiques, seu-
lement admonestant les ieunes Me-
decins que les malades, qui sont tra-
uersez en l'vn ou l'autre des flancs ou
costez d'une douleur opiniatre &
avec pesanteur, si qu'ils sont con-
traints de dormir sur leur dos, iceux
auoir vn amas de sang, ou desia de
pus retenu long temps, non dans les

anfractuosités des intestins, mais entre les tuniques, ou au mesenteré, cōme j'ay remarqué és ieunes hommes naguere mentionnez. Car quand aux autres flus qui ont quelques humeurs acres, ou mesmes vlcères possédants le propre corps des intestins, ils sont distinguez de ceux-là par des espreintes & viues trenchées à l'entour du nombril, plustost qu'aux costez.

Passons donc aux prognostiques briefuement r'enuoyant la plus exacte recherche des signes tant prognostiques que diagnostiques, à nos vulgaires praticiens rapportants fidellement tout ce que l'Hippocrate & son commentateur en ont dit; car ie ne rempli volontiers & grossi mes escrits des obseruations & decrets d'autrui & signamment de ceux que les barbiers mesme tiennent en leurs boutiques, me suffisant de diuulguer

mes propres opinions & obseruations:
& par ainsi me contenteray-ie de dire en gros que ces maladies commenceâtes par fieure ardente soit dès le premier iour, soit sur le quatriesme, & avec vn flux grandement furieux & desbordé & principalement bilieux ou sanieux, & tumeur, dureté, ou tension de l'hypocondre droit, insigne lassitude, ou grauité plombée de la personne, cardialgie, & froidure des extremités, & grande ardeur interne, & alternante, sont pour la plus part mortelles & dans peu de iours; & pour le reste des autres differences, elles sont de durée d'un mois au moins quant à la fieure, car le flux & signamment l'vlcere passe bien outre: & de plus aussi seront aduisez les ieunes Medecins, que quelquefois la fieure demeurant obscure & s'allentissant tout à coup avec le flux faut attendre aux pre-

mier grand changement de temps, vn redoublement de fieure avec fluxions notables sur quelque partie; & signamment sur les iointures, & icelles de durée au moins de quarante iours (car fouuét c'est pour six vingt) & ceés ieunes gens replets, & qui ont negligé la saignée & purge conuenable, durant la premiere venue; comme en peut faire foy vn & deux ieunes religieux d'icy:

Je ne veux oublier en ce lieu deux questions particulieres, qui sont à nostre propos, & dignes d'inquisition, dont la premiere est si nous auons iuste occasion de craindre ceste année mil six cent vingt trois la mesme felonie & malignité de ceste maladie, que nous experimentasmes l'an passé. La seconde sera, si nostre maladie est contagieuse, comme la plus part tiennent. Pour la premiere à la verité ceux qui l'ont eu l'an passé & furent

& furent grandement ou longuement purgez par le flux, ne la doiuent apprehender, combien que nostre escolier Bourguignon mentionné cy deuant l'eust pour la seconde fois dans vne mesme année non moins fascheuse la seconde que la premiere. Mais pour le reste elle est bien à craindre à tous ceux que i'ay qualifié par cy deuant auoir la disposition & apparat, eu esgard que l'ardeur & constitution de l'air cause efficiente de la maladie a commencé de meilleure heure & excède aussi de beaucoup la vehemence & intention de celle de l'an passé, & signamment la seicheresse, laquelle suiuant l'observation d'Hippocrate est fort seconde en dysenterie de soy autrement plus salubre suiuant les aphor. d'Hippoc. du 3. liure. Mais toutesfois comme nous auons eu vn hyuer fort bening & moderé la presente

année, j'espere que la masse du sang n'aura conceu si grand apparat ou intemperie capable de receuoir vne soudaine exarsion que l'an passé, auquel à dire vray le long & tres-aspre & cruel hyuer tout ensemble rotist insensiblement & lentement le sang en ceux qui sur l'esté suiuant tomberent tout à coup par la longue & continue action de la chaleur d'iceluy quoy que plus moderée que du present & qui pourtant foisonna grandement en nostre maladie, suiuant l'aphorif. du mesme Hippoc. à quoy aussi deuons nous adiouster la secheresse presente consumer grandement les serosités exorbitantes, cause dispositiue. Touchant la seconde question ie conuien bien nostre maladie estre cōmune & vulgaire, pour auoir vne cause qui peut toucher indifferemment toute sorte de personnes, comme nous auons dit, Mais que

la maladie se puisse communiquer de personne à autre, ie ne le puis accorder, si ce n'est qu'elle soit coniointe à la peste, c'est à dire causée d'un air de soy putride, & pestilent, cōme il arriue que la dysenterie quelquefois suruiuent aux fieures pestilencieuses, ainsi que Ioseph a remarqué de son tēps au 6. des antiq. & le Sieur Duret en l'année 1539 : car ie ne voy point par quel moyen & par quelle voye la maladie puisse infecter autrui, ne se iettant au cuir, ny à autre partie qui puisse transpirer les vapeurs foetides & malignes de la maladie, & s'il y a à craindre quelque contagion, les ministres de nos malades la doiuent seuls apprehender, lesquels toutesfois n'en encourent aucun danger sinon en vn temps de peste.

Mais il est desormais temps de passer au principal, & traiter premie-

rement de la cure, puis dire vn mot de la preservation, car pour la plus part les remedes qui sont profitables à la guarison, sont aussi puissants pour la preservation. Pour donc prendre par ordre & avec raison les indications des remedes sortables à nostre maladie, il nous faut ramenteuoir que comme ainsi soit, qu'il y ait deux diuerses affections contre nature coniointes ensemble, desquelles il faut auoir le principal esgard à sçauoir la fieure & le flux de ventre contre nature, & que la commune pratique emploie communément tout son soing à arrester, ou moderer le flux importun mespriant la fieure, si est-ce que la raison veut le cōtraire, & qu'on butte principalement à esteindre la fieure, le flux ainsi s'arrestant ou moderant de soy mesme, si tant est qu'on puisse oster la fieure, comme icelle estant

l'occasion, ou plustost cause efficien-
te du flux, si nous nous iouuons la
fiere n'estre autre chose la definis-
sant par sa cause efficiente qu'une
ferueur, & ebullitiō de sang en quel-
que part, de laquelle ferueur le flux
est le progrès & continuation iettant
au long & au large, & comme vomis-
sant par les contours des veines ius-
ques aux extremités finissantes aux
intestins les parties tenuës du sang
separées & escumantes par la mesme
ebullition, si que en vain on s'effor-
ceroit d'empescher ce vomissement
des veines, tandis que la ferueur ou
incendie interne cōtinuë, & est quasi
impossible de ce faire quoy qu'on
encroute, & emplastre les intestins;
car il faut qu'il se face voye ou re-
brouffe chemin dans l'interieur, &
ce avec danger de grand amas ou
empieme du mesentere, le chemin
du sang par les intestins estant inter-

cepté ; & quand bien on le pourroit faire , l'on ne gaigneroit rien que de retenir ce qui est entierement contre nature & ne se peut amander , & arresté au reste quelque part que ce soit apporte vn plus grand mal , & par ainsi nous deuons de necessité nous estudier auant toute chose à remédier à la ferueur interne si nous voulons arrester le flux , c'est à dire obuiuer que rien n'escume hors du corps , autrement ce seroit vn trauail aussi vain quē de vouloir arrester vn torrent. Donc le premier but est de pourueoir à la fieure , combien que cependant on peut dōner ordre que le flux n'apporte que le moins que faire se pourra d'interest , & fortifier pareillement nature par substitution des esprits vitaux ou reparation de ceux qui en toute excretion immodérée & signamment de sang se vont espuisant. Que si quelqu'vn me dit

nonobstant le desbordement du flux ne paroistre toutesfois fièvre aucune, & de plus le plus souuent le malade sembler plustost estre saisi d'une affection contraire, c'est à dire refroidissement de tout le corps, ie luy maintien au contraire, que iamais ne suruient flux de vêtre qu'en fuite de quelque ferueur de sang, par laquelle il va escumant les eaux, ou autres parties separées par l'ebullition, soit qu'elle soit causée d'un principe de sa nature actuellement chaud, soit par accident, comme nous auons euidentement demonsté par cy deuant. Or donc si nostre fièvre, la definissant par sa cause n'est autre chose qu'une ebullition de sang pressé dans les veines de quelque partie, ou cavité du foye & veines meseraïques, & eschauffé par sa trop grande quantité, & la definissant par son essence, vne intemperie du cœur & des esprits

vitaux, & coniointement de toute l'habitude du corps, & que pour tollir l'effet il faut au prealable oster la cause, tout homme de si petit iugement qu'il soit doit conclurre aussi tost qu'il faut instamment & premierement descharger ou diminuer la quantité du sang pour luy dōner air, & transpirer les excrements fuligineux, & puis ou en mesme temps corriger l'intemperie inuste en la partie & en tout le reste du corps par rafraichissements conuenables & oppositions promptes aux causes mouuantes & occasions, si que les principales indications de la cure pretenduë sont partie la diminution de la plenitude du sang, comme aussi la vuidange & diuersion ailleurs de la pleonexie se-reuse bilieuse, & en quelque espeece la purge de la pituite & mucosité, partie la correctiō de l'intemperie chaude & seiche tant de l'esprit vital &

masse du sang, comme aussi de l'habitude du corps, & principalement du foye. Toutesfois touchant la plénitude sereuse comme par l'ebullition du sang elle escume ja assez ou trop suffisamment il ne s'en faut mettre beaucoup en peine, si ce n'est que icelle soit meslée avec beaucoup d'humeurs bilieuses, auxquelles le sang par l'inflammation qu'il conçoit se conuertit presque tout ou grande partie. Mais quand à la bile signamment & la pituite salée d'autant que par leur lenteur, viscosité, & espaisseur (Pour entrer en la consideration des indications qui se peuvent tirer du flux) elles passent trop lentement & tardiement les intestins, & signamment si elles sont arrestées par les mucosités, qui de plus hebetent le sentiment des parties, & ainsi ne sollicitent la nature à vne plus diligente excretion & arrestées

ratissent la substance des intestins & vlcèrent & creusent partant conuient leur donner le mouuant & quelque compulsoir, affin que passant plus legerement & tout à coup ils n'offencent si notablement: Quoy faisant aussi tout d'une main faut reboucher la pointe, & amortir l'acrimonie de l'une & de l'autre humeur, munir, deffendre, & fortifier les parties relaxées & irritées par la malignité d'icelles & signammét l'estomach, & enfin remedier aux vlcères par tout raisonnable moyen. Bref touchant les symptomes qui suruiennét, & trauersent nostre maladie, comme veilles, douleurs, abomination des viandes, la soif demesurée, cardialgie, & semblables, autant comme faire se pourra il conuient y apporter tout soulagement.

Or comme toute la matiere, & moyens ou remèdes qui peuuent fa-

tisfaire à toutes ces indications , se rapportét à trois chefs, à sçauoir à la Chirurgie, pharmacie, & diete, nous commencerons par les deux premiers, laissâts la diete pour la derniere pour estre commune, & ja toucher la precaution de nostre maladie, que nous auons dit deuoir estre post-posée à la cure comme fondée és remedes qui sont propres à icelle , estant chose bien auerée que les remedes qui sont propres à guarir vne maladie presente, sont aussi tres-puissants pour la destourner & nous en garantir: Aussi est-il iuste de secourir tousiours plustost ceux qui de fait sont trauaillez, que ceux qui sont seulement menacez ; *qui ha tempo ha vita*, dict le prouerbe Italien. De plus comme ainsi soit qu'il y ayt diuerfes especes, & differences de nostre maladie , ce n'est mon aduis d'y appliquer particulièrement à chacune les

trois genres de remedes susmentionnez, mais traitant de la necessité, methode, & vsage legitime d'un chacun d'iceux à part & par ordre, declarer briefuement en quelle espeece de nostre maladie vn chacun d'iceux sera vtile, & le moyen legitime d'en vser mesme comme la fièvre & le flux vont de pair, & s'accôpagnent inseparablement, aussi conuient-il en mesme temps auoir esgard & satisfaire aux indications de l'une & l'autre ensemble, appliquant toute sorte de remedes, & ce afin que nous ne soyons obligez de redire souuēt vne mesme chose, & ainsi ne tirions nostre discours en vne longueur ennuyeuse.

Pour entrer donc en matiere & commencer par les indications des causes qui sont de plus grand poids, & desquelles despend tout le chaînō de plusieurs symptomes & incom-

moditez, desquelles le chef à la vérité est la plénitude du sang, & le remede d'icelle est la saignée qui se prend de la Chirurgie, nous commencerons par icelle, & premièrement nous aduiferons soigneusement à sa nécessité & vtilité. Car auant quarante ans en çà il ne se parloit nullement de la saignée, & le premier qui la mise en vſage fut le Sieur Marescot fameux Medecin, & grand praticien de Paris, à qui il vint en l'ame de faire ouurir la veine à vn adolescent, pour auoir veu cinq de sa camarade estudiants au College du Cardinal le moine tous enfans de maison mourir de ceste maladie, ayant recogneu par l'anatomie tous les intestins gangrainés; & ce heureusement: car iceluy par le benefice de la saignée euada; & depuis assez communément on a pratiqué ce remede, mais à Paris presque seulement

car ailleurs raremēt il s'est prattiqué, si ce n'est que depuis le fleur Massarie mon maistre de Padouë grand Galeniste au reste l'a eu fort hault-loüé & mis en credit. Et depuis trente ans ie l'ay tousiours esprouué avec bon succès, Dieu mercy, ayant esté par le fleur Marefcot animé à ne le craindre, ains en vser hardiment l'occasiō quelle quelle soit se presentant de ce puissant remede. Et pour venir à la raison, si nostre maladie est fondée sur la plethore & ferueur de la masse du sang croupissant au foye & aux enuiron, & sur vne chaude & seiche intemperie de toute l'habitude du corps, qui ne iuge avec moy la saignée estre vn tres-present & tres-necessaire remede de nostre maladie? *si vis extinguere flammam, subtrahere ligna foco.* Et n'y ayant aussi remede plus prompt à rafraichir les visceres & tout le corps que ladite saignée,

outre les autres indications remarquées par le sieur Massarie preallegué, quel plus assésuré moyen que la mesme saignée pour destourner les fluxions & inflammations, adioustons la gangraine, ou mesme pour appaiser les douleurs suiuant la doctrine de Galien? Mais on me dira que i'ay logé le foyer de nostre sieure principalement en la partie interne du foye, & au tronc, racines, & rameaux de la porte; lesquels ne peuuent estre deschargez par saignée n'ayant aucun rameau finissant au cuir, & qui puisse estre ouuert. Je l'aduouë voirement, mais premierement on ne me peut nier que par consecution de vacuité la partie conuexe estant deschargée par la saignée, l'interne se peut aussi vuidier par les anostomoses communes des racines tant de la porte, que de la caue, & aussi tout prudent Medecin ne doit pas

seulement auoir esgard à la cause coniointe, ainçois à l'antecedante, c'est à dire à la matiere voisine à la partie affectée & signamment en la maladie de question, d'autant que tout fouyer actuel commenceant à fumer, a ceste force d'attirer à soy toute la matiere circonfuse, & combustible, comme le tesmoignent les horreurs, rigueurs, & tels symptomes qui suruiennent au commencement des accès de toute fieure intermittente, lors que son brasier s'allume à bon escient; car il va tirât quant & soy avec violence les esprits & la masse du sang, comme faiët vne ventouse l'air circonfus, & ainsi priuant la circonference du corps aucunement de sa chaleur naturelle. Donc comme ainsi soit qu'en nostre maladie le sang de la porte commence le premier à se pourrir, & conceuoir vne flamme lente, si est-ce que dans
le qua-

le quatriefme ou feptiefme au plus tard, la flamme ou pourriture de neceffité fe va efpendant à la partie conuexe, & racines de la caue, fi vous ne les defchargez promptement & ventilez; fi que n'y ayant moyen plus prompt de ce faire, nous deuons conclurre la faignée eſtre tres-neceffaire. Et de fait i'ay remarqué que ceux qui ne ſe ſont adreſſez à moy qu'apres le premier quartier paſſé, ou qui ont refusé la faignée, pour la plus part leur en auoir mal pris, & auoir eſté emportez par vn phlegmon ou inflammation de ce viſcere. Je ne veux pas toutesfois maintenir indifferemment en tout flux y auoir eſgalle neceſſité de ce remede. Car exemple en vne ſimple diarrhoée ſereuſe principalement & meſme bilieufe d'vne bile paſſe & icelle occaſionnée par quelque froidure ſoudaine ſurprenant vn enfant, & per-

sonne mal couuerte de nuiët ou mal habillée du matin, & qui ne seroit fort en bõ point, ny atteinte de lassitude, ny mesme importunée de la soif, ou autre symptome de fieure, ie n'entend pas auoir lieu la saignée, mais en vn ieune homme de bon point & qualifié comme i'ay dit, encore que la fieure soit obscure, pour preuenir les fausses propheties, comme l'on dit, c'est à dire destourner vn mal qui peut arriuer, & qui est bien à craindre, certainement c'est le plus seur d'employer la saignée, la prudence humaine nous commandant en affaire douteux prendre les choses au pire. Pareillement la fieure ayant pour cause continente l'impurité du ventre pituiteuse, ou muceuse pourrissante, comme il aduient aux enfans & garçons, il n'y a grande necessité de la saignée, si ce n'est qu'elle soit accompagnée de trenchées bien ver-

tes, & frequentes, qui donnent apprehension de quelque inflammatiō ou gangraine, toute cuifante douleur ayant cela de propre d'attirer le sang à foy, & les intestins estants environnez de myriades de vaisseaux. Car en ce cas encorey auroit-il raison de conseiller vne legere saignée signamment en vn corps plethorique; car quant aux diarrhoées de pituite, ou *serum* lent & falsugineux, tombant de la teste en grande quantité dans l'estomach & la region alvine, il y a moins de doute de fièvre presente quoy qu'obscur, d'autant que la pleonexie sereuse, & cephalique est tousiours fomentée par vn continuel transport des eaux pour la plus part bilieuses, qui escument en hault par la force de la ferueur du sang, combien que lente quelque part qu'elle soit; & signamment en la veine caue ou artere ascendante, à la

quelle ferueur quoy que mediocre pour remedier, ie ne sçache point de plus present refrigeratif que la saignée. Quand aux autres diarrhoées bilieuses de toute espeece, qu'on ne me die le sang estre le frein de la bile; qui est le commun iargon des Arabes Aimaphones. C'est vn scrupule bien mal pris, si nous nous souuenons que la cacochymie bilieuse est seulement l'escume du sang bruslant ou pourrissant, & qui d'heure à autres engendre par la continuation de la fieure particuliere du viscere; & par ainsi deschargeant bien le foye de ceste plenitude du sang, on oste la matiere du flux & empesche-on la generation de la bile en si grande quantité, qu'elle puisse ylcérer à la longue par la lenteur de ses traueses le corps des intestins, & rendre les deiections sanglantes. Enfin quant aux dysenteries illegitimes, & qui vomif-

sent le sang & bientost apres le pus (car i'en ay veu dans trois iours mesme tantost purulentes, tantost sanieuses, le sang aux ieunes gens chauds & humides se purifiant, ou pour mieux dire se rendant purulent pour l'ordinaire dans quatre iours, voire és pleuresies ou membranes moins chaleureuses, nonobstant que Hippocrate en demande quatorze) és dysenteries dis-ie illegitimes ny peut auoir doute la saignée estre tres-necessaire, tant pour la descharge de la plenitude que pour l'accoisement de la ferueur.

Venons maintenant à l'vsage de ce remede si important; & premiere-ment touchant la veine à ouurir, il seroit à souhaitter, qu'oⁿ peust ouurir commodément les hæmorrhoides; comme estants les plus proches & commodes pour la descharge de la veine porte, & de ses rameaux, mais

és personnes qui n'y font subiettes
ce n'est pas chose aisée; & d'ailleurs
il y auroit iuste soupçon d'attirer à
la partie mal affectée: & partant fault
promptement ouurir la veine basili-
que droite, comme la plus propre &
prochaine du siege de la maladie, de-
quoy personne ne peut douter, &
pour la quantité comme sans diffi-
culté on n'en peut tirer librement la
quantité raisonnable à raison que ce
remede de soy est aucunement des-
crié de tout le monde, & ainsi le Me-
decin, indication prise de sa propre
reputation, ne doit donner soupçon
d'en tirer par trop à la fois, mon aduis
est qu'on partage la saignée tant
pour ceste raison, que pour deux au-
tres bien peremptoires, sçauoir pour
faire meilleure reuulsion, & aussi
pour moins affoiblir le corps par ce-
ste mi-partie saignée, car à dire vray
on ne doit craindre vn petit excès

de la saignée en ce cas, pour couper chemin au phlegmon qui est du tout à craindre icy, & aussi pour diminuer & allentir l'extreme precipitation du flux qui par ce moyen fera grandement amoindry, & par ainsi les vlcères, effects d'iceluy, notablement retrâchez, & quant & quant rafraichie grandement toute l'habitude du corps; qui n'est l'une des moindres utilités de la saignée. Certes ie me suis fort bien treuvé de reiterer voire deux fois la saignée és corps plethoriques, & accompagner la saignée du bras droit de celle de la basilique gauche, & pourroit-on mesme au lieu d'icelle ouurir la malleole droite, puisque la plenitude du foye se peut descharger aussi bien par les rameaux du tronc descendant, comme de l'ascendant, suivant la doctrine de Galien: & sans cela on le doit faire en cas que les hæmorrhoides ou men-

strues seront supprimez; aux garçons toutesfois voire au deçà de huiët ans chacun sçait qu'on doit estre plus reservez, mais non tant qu'on les espargne du tout, comme iusque icy on a fait à leur grande ruine. Certes i'ay bien saigné par deux fois le fils de Iuuenal non encor aagé de six ans, & si fauorablement que l'ardeur de la fieure & impetuosité du flux furent dans le iour suiuant presque du tout arrestez & allentis. I'ay dit au reste ce remede deuoir estre apporté promptement: car mesme il n'est de besoing absoluëment & en tous indifferement de lauements ou minoratifs pour émonder l'estomach & premiere region.

Des autres operations Chirurgiques ie n'en voy la pratique en vslage non plus que la necessité: car exemple d'appliquer des ventouses succedanées à la saignée se seroit im-

portuner les malades sans profit, le foye ne se pouuant descharger nullement par elles. Le secours aussi, & fruit qu'on pourroit esperer des cauterres soit aux bras, soit aux iambes, viendrait trop tard, combien que si le flux & fièvre prenoient le train de durer quelques mois, comme il arriue en hyuer, voire des années, comme j'ay veu au sieur de S. Balmon & au Bourguignon susmentionné, & aussi en la femme du sieur Chastelain de Felin, ne seroit à reietter. Mais c'est assés parlé des remedes, l'operation desquels est manuelle, si nous ne voulons adiouter les frictions cōme remedes reuulsifs; desquelles on peut vser souuēt pourueu qu'on ne morfonde le malade, & ce auant le repas.

Venons à la pharmacie, commençans par les cathartiques, comme ceux qui peuuent diminuer & de-

stourner la plenitude sereuse (occasion de la putrefaction du sang) & aussi purger les escumes d'iceluy, ou cacochymie principalement bilieuses, & de mesme l'impurité pituiteuse, toutes deux matiere du flux si-
gnamment diarrhoée, & causes aussi frequentes des vlceres, qui constituent la legitime dysēterie, & considerons si l'vsage d'iceux peut auoir lieu: car ie voy nos Medecins les plus autorisez ne s'accorder en ce point, ains mi-partis, & liguez l'un contre l'autre, les vns l'approuuants les autres le reietants entierement. Mais laus meilleur aduis à mon iugement en cest perplexité on peut tenir vne voye metoienne, suiuant le mot ancien, *Medio tutissimus ibis*. Car premierement il n'y a point de doute, & auons Galien pour garant qu'en la diarrhoée pituiteuse, soit cephalique, soit stomacale on peut & doit-on

asseürément vser de quelque deterfif
leger, comme miel rosat laxatif, de-
coctiõ de tamarinds, & mirabolás ci-
trins ou Indois, ou mesme de la rheu-
barbe, & ne deuõs craindre, signam-
ment de la rheubarbe, que nous atti-
rions trop à la partie affligée & ainsi
augmentions les douleurs, vlceres,
ou inflammation des intestins d'au-
tant que tels medicaments & princi-
palement le dernier, ne tirent pastant
au ventre, qu'ils ouurent le viscere &
portent la bile avec les ferosités de-
dans les reins & voyes de l'vrine,
comme l'experience le tesmoigne,
estant la rheubarbe vn tres-puissant
diuretique plustost que laxatif; car
il n'arreste en l'estomach comme les
vrais laxatifs, ains est porté & se faict
voye par les visceres, comme le mon-
stre l'vrine qui en prend sa teinture,
c'est à dire sa substance sur tous les
autres medicaments. Et quand bien

il attireroit, il deterge aussi & mondifie l'humeur attirée, & ne le laisse croupir ou adherer aux parties, & ainsi luy oste le temps de blesser les intestins. Car la raison du sieur Valles me semble fort peremptoire, à sçauoir qu'il est plus expedient de nettoier tout à coup les humeurs peccantes, mesme par le ventre, que de les laisser figer, s'attacher, & lentement vlcérer; l'experience nous monstrant que l'eau tombant goutte à goutte a plus de pouuoir de miner, & creuser la pierre, que iettée à grands seaux en mesme quantité, suiuant le prouerbe grec rapporté de nostre Galien πέτραν κοιλαιή ράνει ἐν δέλεχῳ. Et à la verité comme le flux n'est qu'une expuation du sang bouillant plus ou moins, & que sur le progrès de la maladie les ferosités s'ont pour la plus part espuisées, ainsi l'escume en reste plus crasse, & tenace & lors plus active,

& vlcerante , & ainsi ne peut passer par les intestins que fort lentement, il est raisonnable luy donner moins de loisir & de luy hastier son seiour & croupissement par deterfifs & choses qui sollicitent la nature à s'en deffaire, autrement l'vlcere prendra grand accroissement. Quoy faisant aussi (car ie veux bié que la rheubarbe attire mediocrement) le viscere ou foyer de la maladie sera d'autant plus repurgé, & par consequent la fieure & chaleur contre nature des parties fomentées par moindre allumette. D'ailleurs nous ne deuons trouuer estrange qu'il se face quelque attraction d'humeur peccante aux intestins puis qu'ils sont naiz & faits, pour estre le receptacle & cloaque de tous ou de la plus part des excrements, nature les ayant enduits & munis de mucosités grossieres & defendables contre les iniures, &

pointes d'iceux; laquelle raison en-
ue grandement & affoiblit la princi-
pale raison & piece de batterie
prinse par Massarie dans l'arcenal de
Galien & éslancée contre eux, qui
ne font difficulté d'vser des medica-
ments susdits pour retrancher en
partie, & le fouyer, & l'escume qui
afflige les intestins en nostre maladie.
Et certes si en cecy on se doit rappor-
ter à l'experience, ie puis professer
hardimét que l'vsage de la rheubar-
be est tres-salubre en nostre maladie,
car d'ordinaire laissant à part tous les
autres purement astringents & em-
plastiques, dont la plus part des prati-
ciens se contentent seulement aux
progrés de la maladie, i'vse de quatre
ou sept iours à autres de ce remede,
pour à mesure que le sang va tous-
iours se brullant rotissant ou pour-
rissant, en deliurer plustost le foye
de ses escumes & quant & quant les

haster de trauerfer les intestins avec moins d'incommodité & danger, la generation d'icelles escumes, tandis que l'intemperie & ferueur dure, estant ineuitable: & entre-deux vser de toute sorte de moyens tendants au rafraichissement de la partie, & allentissement de ceste ferueur: ainsi heureusement ie l'ay practiqué en tous mes malades, & nommément en Madame la Gouuernante de Nancy, qui au bout du mois de la lune fut guarie d'une fièvre & flux mixte grandement sanieux & bilieux par le seul vsage alternatif de rheubarbe & decoction de cichoracées.

Pour venir donc à la pratique, en la diarrhoée pituiteuse suffirôt deux ou trois onces de miel rosat laxatif destrempé en vne decoction d'un peu de menthe & de deux dragmes de mirabolans chebules, & autant de seméce de carthame, qu'on pourra

reiterer souuent, n'approuuant en ceste-cy les plus puissants laxatifs, puisque la pituite se presente incontinent. En la bilieuse (car quât à la sanieuse elle est rarement syncere, ains meſſangée avec l'une ou l'autre; & la pure ne demande pas tant la purge, que la saignée reiterée & en petite quantité) en la bilieuse dis-ie nous prédrons pour la premiere fois trois onces de sirop rosat laxatif dissous en vne decoction de cichorée & de trois dragmes de tamarines & moins de mirabolans citrins, ou dans vn demy-verre de puron de laict chalibé & bien purifié. Et pour la seconde fois à reiterer quatre ou sept iours apres selon l'exigence se prendra vne infusion d'une dragme & demie de rheubarbe dans la decoction de cichorée simple, adioustant le sirop rosat laxatif, ou semblable, & s'en fera vne potion mediocre, laquelle on peut fortifier

fortifier par l'adionction d'un scrupule de rheubarbe en poudre, laquelle potion se peut changer au sirop de cichorée composé avec rheubarbe qu'on garde aux boutiques; & ce en la quantité de deux ou trois onces selon l'aage, ou delicateſſe du malade, deſtrempant iceluy avec ptiſane ou la decoction ſuſmētionnée: ſi toutesfois le flux eſt mixte il eſt à propos d'adiouſter à l'infuſion de rheubarbe un ſirop qui regarde la pituite comme le miel roſat laxatif, & de plus ſi le malade abhorre la potion, & meſme qu'il ne puiſſe prendre la rheubarbe en poudre deſtrempée d'as un peu de vin blanc & eau de cichorée ou pourcelaine, il pourra non moins fructueuſement uſer de la rheubarbe en poudre incorporée avec conſerue de roſe ou de cichorée, à ſcauoir meſlant enſemble le poids d'un eſcu de l'une & de l'autre,

ou bien demy once de pulpe de tamarinds avec autant de sucre rosat, & deux ou trois grains de diagrede meſlé tout enſemble en forme de bole (qui eſt prins d'Auicenne) mais ſeulement propre pour les perſonnes grandement robuſtes & en vn flux moderé: ie me ſers auſſi ordinairement & familièrement de la rheubarbe avec le ſuc de cichorée condensé au ſoleil & formé en pilules, comme auſſi i'approuue fort la poudre de *Philonium* compoſée de trois dragmes & demy d'eſcorce de Mirobolans citrins, & d'vne dragme & demy de rheubarbe torréfié & mis en poudre, laquelle ſe deſtrempa dans l'eau ferrée pour prendre durant trois matinées: pour les plus pauvres ils ſe pourront contenter du marc qui reſte des expreſſions de rheubarbe, dont les Apoticaires leur en feront volontiers l'aumône; ou

bien de *diaprunum* simple. J'ay dict au reste la purgation estre vtile en nostre maladie, mais cela s'entend tousiours la saignée premise où elle est necessaire, & passé vn ou deux quartiers de la maladie: car du commencement que le flux est extresmément desbordé iusques à contraindre les malades d'asseller quarante ou soixante fois en moins de vingt quatre heures, il n'y a apparence d'importuner les malades de breuuage qui ne sortiroit effet, & aussi tost seroit emporté par le flux immodéré. En vn flux dis-ie moderé la purge suiura la saignée, mais passé au moins vn quartier, si ce n'est qu'es personnes qui ont l'estomach plein d'impurité comme gens de crapule, & de bonne chere, on trouue à propos entre les deux saignées prendre vne dose de miel ou sirop rosat laxatif, ou au moins vn lauement simple & deter-

fiſ cy apres à deſcrire, non tant pour crainte que par la ſaignée ceſte impurité ſoit tirée aux veines (car il n'y a que prou de ſang, ainſi ceſte crainte eſt nulle) que pour preparer le corps à l'vſage des remedes deſquels nous parlerons incontinent, qui pourroient trainer & tirer quant à ſoy l'impurité alvine au preiudice du malade, & deſquels au reſte l'vſage ſera permis incontinent apres la ſaignée & avant autre purge plus grande.

Pour donc particulariſer les remedes neceſſaires à noſtre maladie outre la ſaignée & purge, iceux ſe deuantſ prendre partie de la fieure & chaleur exceſſiue, ainſi deuant eſtre rafraichiffants, & familiaires à toutes les parties nobles, & ſignamment au foye; partie du flux, la matiere duquel conuient diminuer tant par les remedes que deſſus, que par reuul-

sion & deriuation & destourner par diuretiques ; & de plus emousser sa pointe, & corriger son acrimonie ou autre malignité, partie des symptomes importants, auxquelles indications tout ensemble ou à la plus part peuuent satisfaire les remedes sui-uants, à sçauoir pour commencer par ceux qui se prennent par la bouche, sirops, conserues, decoctions, & suc; entre lesquels toutesfois l'usage des derniers est à preferer à celuy des premiers ; raison de ce est que les medicaments succez & mielez aisément se conuertissent en bile iettez en vn corps brullant. Mais comme d'ailleurs les decoctions sont ingrates aux malades signamment delicats, il n'est hors de raison de les addoucir par la mixtion d'un peu de succe ou sirop bien agreable. Et comme ainsi soit qu'ils ayent besoing de vehicule, si est-ce que le vinaigre est de-

fauorable aux parties membraneuses & signamment vlcérées. Or la matiere de ces decoctions se prendra des plantes de temperature refrigerante & familiere au foye, comme sont toutes les especes de cichoracées qui sont doiüées de ces qualités requises, outre ce qu'elles purgent puissamment par les roignons tant les serosités superflües, que l'escume bilieuse, & ce avec adstriction qui robore le dit viscere & mesme l'estomach, y adioustant des diuretiques froids, & communs comme capillaires, semences froides de melon, concombres, citrouille, & sur tout de coin qui fortifie l'estomach & ouure les veines; & si besoing faiet aux flux plus desbordez nous adiousterons non seulement des herbes desechantes, & plus adstrictiues, comme pourpier, plantain, oseille avec leurs semences, mais aussi des poudres des

trois fantaux. Exemple aux flux grandement bilieux. Prenez de la cichorée entière, dent de lion, laitton, agrimoine, endive, pourpier, oseille tant commune que ronde (deux ou trois, ou vne mesme sorte mais en plus grande quantité suffira) de chacun vne poignée, ou de deux deux poignées, ou maniples; semence de melon & de pourpier de chacune le poids d'un escu. Vous ferez cuire tout ensemble y adioustant vn peu d'orge entier & sur la fin vn œuf entier, concassé pour passer le tout par vne estamine, en laquelle decoction adioustées deux onces, ou vn peu moins de sucre pour vne chopine, la remettrez sur le feu & donerez vn petit bouillon & aromatiserez avec vn peu de poudre triafole. Au lieu de sucre l'on peut dissoudre quelque sirop de mesme nature, capillaire, de cichorée simple, le sirop de

taraxacon (que ie prepare pour les douleurs nephretiques, & est singulier pour ce fait, comme aussi la racine confite, prinse avant vne decoction simple) Item tablettes de suc cre rosat. Et sur tout ie fais grand estat du suc de cichorée condensé au soleil és iours caniculaires, & que ie fais tenir en nos boutiques; on en peut former vn bole y adioustant à vne demye once d'iceluy vn scrupule de poudre *diarrhodon* ou *triasantali*; & se peut prendre auant les repas, ou auant la decoction susmentionnée. Les plus delicats & difficiles ne refuseront au moins le Iulep Alexandrin, qui se faiet avec vn peu de suc cre fondu en eau rose, & eau commune boüilly ensemble; ou substituerôt vn verre d'eau clair y dissouldant du sirop capillaire, & le tiers de sirop de coing ou grenade. Aux flux pituiteux purement & sans fièvre appa-

rente (car il y a tousiours de la ferveur) les sirops & conserues auront le principal lieu, à sçauoir miel rosat simple, le sirop *cōseruationis citri*, & de menthe, ou d'Absynthe avec *Diarrhodon Abbatis*, auxquels on peut adiouster vn peu de decoction de racines de persil, betoine, menthe, & aromatiser avec vn peu de *Calamus aromaticus*. Et la saison d'vser desdits alteratifs est dès le commencement, mais apres vn minoratif en certain cas, & pourueu aussi que le flux ne soit grandement desbordé, car pour lors les tablettes ou conserues & confections confortatiues comme de hyacinthe, de *gemma*, *diarrhodon*, & *triasantali* seront plus à propos que les decoctions, qui augmentent par leur quantité la pleonexie fereuse; c'est pourquoy en ceste maladie il faut vser fort sobrement & en petite quantité des apozemes ou decoctiōs

ſuſmentionnées, ſi ce n'eſt que la
moiteur du corps & la chaleur du
temps nous inuitent à nous ſeruir
d'iceux pour ſudorifiques, choiſiſ-
ſants les purement aperitifs comme
capillaire, betoine, & les fortifiants
par ligatures, frictions, & vnctions
auec huile de camomille, & aneth.

Au rang des remedes ſuſdits trou-
uent place aupres des practiciens le
laiet calibé, & certaines eaux mine-
rales & ferrées, comme celles du
mont d'*Abano* en grand credit au-
pres des Medecins de Padouë, auſ-
quelles on pourroit ſubſtituer nos
eaux acides de Spa, Birguemfeld, &
Greispach. Et touchant le laiet, pour
deſinir en vn mot ce qu'il m'en ſem-
ble, ie ne le puis approuuer en quel-
que façon qu'on le prepare, tant pour
eſtre condamné par Hippocrate en
la plus part des fieures putrides, que
pour eſtre matiere prochaine de Ca-

cochymie bilieuse en vn corps enflambé. Bien en peut-on vser en clysters, & peut estre au viure, comme nous verrons cy apres, & ie prefereroiy au lai& son *serum*, ou *purum*, mais fort purifié & fortifié de miel ou sucre.

Touchant les eaux acides certes la furie du flux bilieux estant passée, & iceluy tirant en longueur ie ne puis les censurer, pour auoir les qualités qui satisfont à toutes nos intentions, à sçauoir rafraichissement, deriuation par les reins des serosités bilieuses, desopilation, ou ouuerture des obstructions des veines, mondification & desiccation des vlceres, & l'vsage d'icelles doit estre conditionné & qualifié comme l'vsage qui est familier & prescrit aux sains; si toutesfois on fortifie & attrempe le premier verre d'une emulsion de demy-once de semences de melon.

A ſçauoir ſe prendront du matin auant toute choſe, non aétuellement froides, ains tepeſiées, plongeant la bouteille dans vn chauderon d'eau chaude, & la retirant auſſi toſt, ſi on les garde dans vne caue bien freſche, & ſe boiront iuſques à la quantité de deux liures enuiron, vſant entre chaſque verre d'vn peu de canelle ou anis, n'approuuant autrement la liberté que donne Ruidius de cuire les viandes en icelles, ou en boire aux repas, & meſme entre les repas en forme de ſirop, & ce d'autant que ces eaux ne doiuent iamais demeurer au corps, pour eſtre leur reſidence peu amie de la nature: or eſt-il, que priſes és formes fuſdites elles ſe retiennent, & demeurent avec la viande.

Reſte icy à parler, & ſpecifier les remedes aſtringents, qui moderent non ſeulement le flux, & impetuoſité de l'humeur, mais auſſi muniffent

& defendent les parties, & quant & quant defeichent les vlceres, qui sont plus ou moins efficaces & doiuent correspondre à la necessité d'iceux: car au flux mediocre & bilieux nous nous deuons contenter de la poudre d'escorce d'encens, ou de *spodium*, de roses, succe rosat, seule ou meslée avec poudre de myrthe & couraulx, meslant vn demy escu de poudre avec vne once de succe ou conferue de roses antique, ou suc de cichorée condensé, adioustant quelquefois vn peu de bole fin, & au lieu de conferue ou bole pourrons vsfer de sirop de roses seiches, & mirtilles, tragacanth, corne de cerf bruslée & lauée. Exemple prenez deux onces de conferue de roses ou tablettes de succe rosat, vne demie once de suc de cichorée condensé, poudre de *spodium* demy dragme, terre sigillée & bole fin de chacun deux scrupules, adiou-

stant du sirop de coing vous en ferez vne opiate à prédre auant les repas, & l'vsage de toute sorte de decoction & ce de la grosseur d'vne auelaine. Exéple d'vne opiate plus astringéte & desiccatifue. Prenez du vieil suc cre rosat deux onces, balaustes, escorces de grenades, corne de cerf bruslée de chacun le poids de demy escu, terre figillée, ou bole fin; amidon de chacun le poids d'vn escu, sirop de roses seiches autant qu'il conuiendra pour incorporer le tout, & faire vne opiate à vser comme dessus, & boire là dessus la decoction d'endiues, pour pied, plantain, corrigiole, semence d'oseille & de pour pied. Mesmes on peut rendre le medicament moins espais & plus aisé à prendre y adioustant vn peu de sirop de roses seiches ou mirtilles, & si on craint de refroidir l'estomach on y adiousterá aussi vn peu de poudre, ou sirop de men-

the. Et quant aux flux grandement précipitez on viendra aux astringents plus puissants qui selon la doctrine de Galien se prennent des pepins de raisins, de neffles, de cornouilles, noix de gales, mirtilles & semblables. L'Auicenne magnifie grandement l'usage du vieux fromage, qu'il faudra lauer environ dix fois avec suc astringent, comme de coing, ou de neffles, & se peut commodément donner aux enfans, l'ayant premierement bouilly dans du potage. Bref apres auoir en vain essayé des sirops on peut venir aux remedes dits opiats & ce en extrefme necessité, comme sont le *philonium romanum*, les pilules de cynoglossé, ou les grandes antidotes recentes, & le *laudanum* tant extollé de nostre temps. Pour exemple prenez de la conferue de violettes, & du *philonium* romain de chacun le poids d'unescu, formez

6. de simp.
facult.

vn bol & prenez-le sur les dix heures du soir. l'ay dit en extrefme necessité de douleurs, veilles, & flux implacable, & ce apres auoir frustratoirement vsé d'iceux premierement par le dehors & puis en clysters, & sur tout pesées les forces: car icelles ruinées & es moribundes ne faut mettre en compromis la reputation par l'exhibition d'iceux, & cōment que ce soit n'est raisonnable passer la dose d'vn scrupule des premiers mentionnés, & des derniers beaucoup moins. Enfin entre les remedes qui se prennent par la bouche, se peuvent rapporter les medicaments, qu'on tient estre vtiles pour quelque occulte & indicible propriété, comme sont la poudre de la fiente d'vn chien, dure, blanche, & peu fetide, iceluy ayant esté nourry quelques iours auparauant de bons os gras, icelle estant tant prisée des maistres de

de Galien qu'ils ne la declairoient à personne qu'à leurs plus fauorifez disciples; & experimentée auffi du meſme Galien & des recens. Item la poudre de tourterelle ſeichée au four, Item la poudre d'un vieux fourmage bouilly premierement en eau puis deſeiché, la poudre de la verge d'un cerf ou taureau parſemée ſus vne roſtie mouillée dans du ius de grenade ou eſpine vinette, la poudre de licorne, de geſier de poule. Item la preſure ou caillé de lieure, cabry, ou veau laué avec du vin vieil, pris auffi avec du vin, ou decoction de maſtic ou ſuc de plantain depuré.

Voyla les remedes plus authoriſez, puisſants, & proportionnez aux principales indications, qui ſe prennent par la bouche. Venons à ceux, qui s'infuſent par le ventre, & clyſterifent, en intention principalement de nettoier, ou deterger la pi-

uite, & la bile crasse, addoucir la douleur, & attremper l'acrimonie des humeurs, & mesme deffendre le corps des intestins contre la malignité du flux, & remedier aux vlceres, signamment les gros boyaux estant mal affectés, ce qui se recognoit par le sang & pus coulants à part & deuant les excrements communs ou mesme furnageants sur ceux-cy. Et pour les premieres indications quant aux deterifs & lenients, la matiere sera vne decoction d'orge & parietaire ou suc d'orge, *purum* de laiët avec succe rouge, & miel, & s'il y a grande forditie alvine la decoction de *prassium*, gentiane & aristoloche. Et pour lenir la douleur & mitiger la malignité de l'humeur, comme aussi deffendre les intestins, nous prendrons le boüillon de ris, mauve, fromentée, fenigrec, semence de lin, coing, guimauve; ou

bouillon gras, auquel à sçauoir on aura cuit les pieds, testes, & intestins de mouton ou semblables, y adioustant graisse de poulle, de canard, d'oye, cheure, ou bouc, & œufs entiers avec huile rosat : & mesme la douleur pressante grandement, & causante des veilles, & affoiblissante notablement on y peut dissoudre quelque opiate, ou médicament stupefactif, comme le *philonium*. l'vse familièrement pour satisfaire aux premieres de ceste formule, Prenez decoction d'agrimoine, cichorée, parietaire, orge entier vne liure environ, dissoudez du succe rouge, & miel rosat, vne once & demie, du suif de bouc vne once, huile rosat complet trois onces & deux œufs, faites laucement. Pour les pauvres, prenez seméce de lin vne once, semences de coing, riz & bled deseichées au four dans vne tuile de chacun vn peu,

faites le tout cuire dans vne liure & demie de *purum* de laiët, adioustez du suif de bouc, ou quelque graisse du ventre de mouton, beurre frais, miel, de chacun vne once. Item pour vn autre, faites cuire vne poignée de roses rouges dans du *purum* de laiët, ou laiët chalibé, adioustez deux iaunes d'œufs, on y peut aussi adiuster vne poignée de son. Et pour satisfaire à la derniere indication de l'vlcere, la matiere sera *purum* de laiët calibé, la decoction de plantain, *poligonum*, pourpied, tendrons de ronces, roses rouges, queuë de cheual, acacie, *hypocistis*; que si l'vlcere deuient maling, & corrosif entierement, faudra prendre vne decoction d'orge, lupin, & *hypocistis*, eau marine, ou lessiue, & y dissoudre des trochisques d'Andronicus deux dragmes. Et quant aux glutinatifs, seruiron pour la matiere les fleurs & escorces de grenade, *hy-*

pocistis, la noix de galle, le suc de roses, acacie, & terre astringente, & principalement la terre *Samia*, qui seruiront aussi aux vlceres exedants & se clysterisent avec suc d'arnoglosse. Exemple prenez plantain, & pourpier de chacun demy maniple, des sommités de ronces, & de la centinodie de chacun vne poignée, faites boüillir en eau ferrée, & y adioustez poudre de roses rouges, de bole fin, terre sigillée, de chacun le poids d'un escu, huile rosat & mirtile vne once & demie de chacun. Exemple d'un stupefactif, prenez vne liure de boüillon gras, ou l'on aura cuit vne teste de mouton, adioustez quatre onces d'huile violat, deux dragmes, de la confection *requies Nicolai*, le blanc & iaune de deux œufs, & meslez le tout ensemble. Or touchant les epithemes, liniments, & autres remedes exterieurs, nous vserons en la

region du foye signamment des fucs, ou eaux de cichorée, endiue, & roses avec vn peu de poudre de fantaux; ou linirons avec vn onguent rofat de Mesue, ou cerat refrigerant de Galien. Et pour l'estomach, on le fomentera avec decoction de mente, absynte, roses; & quant à tout le reste du ventre pour appaiser la douleur se fera vn liniment avec huile rofat complet & camomille, y dissoudant vn peu de graisse de bouc. Prenez huile rofat complet, ou camomille, ou d'hypericon de chacun deux onces, graisse de poule ou canard, & suif de bouc de chacun demie once, meslez le tout ensemble, ou plustost baignera-on vn feutre, ou toilette de veau ou mouton dans les huiles susmentionnées & frites en vne poile; mais le flux estant fort bilieux & cuisant, dans l'huile rofat recente, l'huile violat, comme aussi

l'onguent rofat, y adioustant au cas de nécessité de roborer les parties & restraindre plus fort l'huile d'absynthe, mastichine, meline. Exemple prenez huile rofat complete, mastichine, de coing, & mirtille de chacun demie once adioustant balaustes, roses, terre sigillée, couraux & semblables. Les fomentations aussi se feront avec suc & decoction de plantain, pourpier, poligone, acacie, *hypocistis*, fleurs, & escorces de grenades. Enfin sur tout le ventre s'appliquera l'emplastre de *crusta panis de Montagnana*, & le diaphenic de Mesué, comme aussi à la plante des pieds, des briques chaudes, arroufées de vin blanc, enucloppées dans des linges.

Bref pour recapituler & specifier l'ordre de tous ces remedes cy dessus tant pris de la Chirurgie, que de la pharmacie, premièrement apres vn lauement deterfif & refrigerant tie-

de au reste, & de quantité mediocre pour estre mieux retenu (qui se pourra reiterer sur le vespre) la veine du foyé s'ouurira, & le mesme iour cominencera-on, à prendre vne decoction refrigerante, premettant en mesme temps si l'on veut vn bole avec le suc de cichorée, & en mesme iour aussi l'epitheme sur le foyé; le lendemain la saignée se reiterera (si on ne veut en vn mesme iour) & pareillement continuera-on l'vsage des lauements; comme aussi ne se negligeront les remedes externes appaisants la douleur s'il y en a, & de là en auant pourra-on commodément vser des reuulsifs & deriuatifs, apres vn minoratif s'il semble y auoir de la necessité. Apres le quatriesme ou septiesme de là en auant s'ensuiura la purgation avec la rheubarbe ou autre, & continuera-on l'vsage des decoctions signamment rafraichissan-

tes & deriuatifues, c'est à dire diuretiques pour venir peu à peu aux desiccatiues tât internes, qu'externes, n'oubliant de quatre ou sept iours à autres là susmentionnée purge & deriuation alternante. Si la fieure & flux tirent en longueur & passent le quatorziesme, l'on viendra aux eaux acides, ou *purum* de laiët chalibé, n'obmettant toutesfois l'vsage des opiates stupefactifs si vne douleur atroce du ventre nous trauerçoit. Enfin les vlceres bien mondifiez & dessechez, on viendra aux agglutinatifs, signamment si l'vlcere est de consequence.

L'on me dira icy auoir oublié vne des principales indications à sçauoir la conseruation des forces ; mais ie respond l'auoir industrieusement fait, raison que cela despend de la partie de medecine dite diëtetique, & regime de viure, auquel il est temps

deformais d'acheminier nostre discours. Et premierement nous adiuferons tous nos malades, qu'ils ne se flattent point, & facent les vaillants contre la raison voulants corrompre leur mal, & aller & venir, n'y ayant rien plus necessaire à la conseruation des forces que le repos, & garder la chambre, & mesme le lict dès le premier iour, tant pour tenir le corps transpirable, que de le deffendre du froid externe cause mouuante du flux des principales, comme nous auons dit, & signamment pour conseruer les esprits vitaux, que le mouuement voire bien mediocre, espuise ou consume quelquelement, si qu'un des plus importants conseils ou plustost commandement est celuy-cy à sçauoir que dès le premier iour du flux & fieure aucunement apparante le malade non seulement se mette au lict, mais deformais n'en sorte nulle-

ment mesme pour asseller, ains vse de bassin accommodé à ce seruice, ou plustost de linges & linceulx ploiez en plusieurs doubles supposez soubs luy & changez à toute heure. Car en ceste maladie si en quelque autre, faut auoir esgard non seulement aux forces presentes, mais aussi futures & necessaires pour la longueur du mal; considéré que le flux & la fieure sont causes tres-puissantes & qui ne cessent iamais d'affoiblir grandement, auxquelles adiousté le moindre travail du corps elles encourent grand interest; & de ce conseil ie m'en treuve extremement bien en tous les malades qui s'y rendent obeïssants, voire dès le premier iour de la maladie. Touchant la qualité du boire & manger, les viandes propres à nostre maladie doiuent tendre à rafraichissement & nourriture grande en petite quantité, & au reste de bon suc,

& de difficile corruption, ains aisées à digerer, & roborantes les parties par quelque peu d'astriction, & enfin en quantité fort mediocre, principalement les premiers iours & ce suiuant l'aduis de Galien & d'Auicenne. La chair de veau est des plus propres si ce n'est aux flux fort excessifs à raison de son humidité superflue & lubrifiante, auquel cas on se contentera des extremités comme pieds pour en faire des gelées fines ou consommées : au reste ie l'approuue plustost rostie mediocrement que bouillie, signamment pour en faire des hachis avec son ius, & la prendra-on fraichement tuée, autrement elle est subiette à se corrompre plustost que toute autre. Mais à la verité il n'y en a point de precipuée en toutes les qualités par dessus la volaille domestique ; i'entend poulles, chapons, poulets, cōme les perdreaux ; car les

autres voire oyseaux de montagnes engédrent yn sang disposé à l'intemperie chaude & seiche. On les peut assaisonner avec ius de citrons, oranges, & vertius de grain qui ne manqué en ceste saison. Le n'improue toutesfois les boüillons sur les mesmes chairs cuites avec endiuës, pour pied, plâtain, oseille, vertius de grain, & és degoustez grandement bien consommez & espaisiss avec mies de pain blanc en forme de panade; ou orge cuit à part pour le commencement de la maladie, & au desbordement du flux avec riz & froumentée, & mesme espaisiss avec poudres de seichantes, sçauoir rasure de cornes de cerf, d'yuoire, de gemmis, & semblables, outre les semences de pour pied: les pressis ou ius de mouton, ou plustost de veau cuits avec vertius de grain sont permis, pourueu qu'on y mette force mies de pain. Le poisson

n'est à reietter estant frais, noble ou laxatil. Nostre Galien recomman-
de fort l'œuf vn peu dur mangé avec
vinaigre ou frit avec vertius de grain,
ou d'oseille: d'ordinaire aux grandes
debilités d'estomach & és morfon-
dus, i'y fay fondre quelques grains de
Mastic, mais il ne faut qu'il soit si
dur. Pour le boire, comme ainsi soit
que pour l'ordinaire on permette le
vin, toutesfois ie ne l'approuue que
sur la fin, la fieure estant au declin
du tout, & au reste trempé avec deux
fois autant d'eau ferrée ou dorée &
iceluy rattelant, garbe, & astringent;
Aux delicats ie leur fay boire du lu-
lep Alexandrin ou decoction de
quelques grains de grenade, avec
mastic, à sçauoir vne dragme de ma-
stic dans vne demie liure d'eau, ou
des grains d'espine vinette, avec ma-
stic, & bois de lentisque, & fort peu
de sucre le flux estant grand. Et

pour le commencement des fieures, vne ptisané d'agrimoine, orge, reglisse, vn peu de sucre, & aromatisée d'vn tantinet de canelle sera fort salubre : nous pouuõs aussi vser d'eau ferrée ou plustost dorée avec vn lingot d'or (pourueu que l'eau ne passe par des tuyaux de plomb qui est fort dangereuse, & excite la dysenterie) y destrampant quelque peu de sirop soit de coing, grenades, ou iulep Alexandrin cuit en forme de sirop, ou bien y battant quelques confitures comme de grouselles, vertius, barbelin, à charge toutesfois que le malade se commandera pour la quantité ne pouuant assés peu boire. Mesme l'vlcere estant grand, on pourra battre vn peu de bole fin avec eau ferrée pour boisson ordinaire. Pour les fruits & autres assaisonnements le malade n'oubliera iamais à l'entrée des repas vne bonne tranche de codi-

gnac sans espices, ou gelée de coing, ou mesme vn quartier de coing confit; sur la fin il peut vser de quelque peu des confitures susdites, comme aussi de biscuit, duquel il fera la moüillette, & mesme de rosties dans vn peu de vin & eau meslez pour soy donner courage, & lesdites rosties trempées premierement en eau, puis vn peu sucrées & arroufées de bon vin. Enfin ie permets aux robustes, & accoustumez aux fallades d'vser à l'entrée de table d'endiue, cichorée, pourpied, mais cuits, avec vn peu de succe au lieu d'huile & vertius au lieu de vinaigre. Or d'autant que le degoust qui est souuent extrefme en nostre maladie fait que le malade n'vse que de fort peu de nourriture à la fois, nous l'obligerons, si faire se peut à trois repas enuiron de six heures à autres; à sçauoir n'y ayant notable mouuement de la fieure le dîner

entre neuf & dix, & le soupper sur les quatre heures apres midy, & vn reci-
né ou collation apres les neuf heures,
où se pourra prendre au moins quel-
que orge, riz, ou panade, comme au
soupper pressis & coulis, & le matin
simple bouillon ou panade avec
chairs ou autres viandes susdites és
deux repas du iour. Car entre tous ses
repas il aura loisir & commodité d'v-
ser de toute sorte de medicaméts. Et
particulierement pour reparer les ef-
prits vitaux on aura soing de souuent
luy faire odorier quelque pain chaud
ou rostie arroufée de bon vin com-
me d'Espagne, ou bien de vinaigre
rosat, eau rose, eau de naphle & sem-
blables, & frotter aussi les temples
avec les mesmes odeurs & ce signam-
ment lors que le malade est contraint
d'asseller. Or particulierement les
Medecins recommandent, & diuer-
sifient les viandes selon l'exigence

des affections accompagnantes nostre maladie. Exemple durant l'occasion de purge, l'on peut vser de viandes laxatiues & humides, si que du conseil d'Alexandre on permet l'vsage mesme des melons & pruneaux qu'on tiendrait toutesfois suspect en ce temps. S'il est question de deterger, l'orge mondé aura lieu, le miel crud, & mesme les choses salées comme meurotte. En la saison de restreindre, le second boüillon de lentilles avec les lentilles mesme, la fallade de pourpied, l'œuf cuit avec vinaigre comme i'ay dit, le plantain aussi avec riz est recommandé & les pommes vertes, & non meures, poires, neffles, cornoilles, poudres de pepins de raisins, poudres & cendres de coquilles d'escargots, ou huitres, & noix de galles & vn peu de poiure, sçauoir la quatriesme partie, de laquelle il faut parsemer les viandes ou

bien de poudre de fiente de chien. Bref touchant la demeure de nostre malade, il preferera la demeure au Soleil leuant ou Septentrion à toute autre, pourueu qu'il soit couuert raisonnablement, & mesme durant les grandes chaleurs, & sur tout l'apres-dinée pourra faire rafraichir sa chambre, la parsemer de feüilles de vigne, & semblables, & l'arrouser de vinaigre, mais avec la condition susdite qu'il soit tousiours bien clos & couuert, si que le corps soit transpirable; qu'on s'estudie aussi à ne luy rompre son sommeil ains à l'ayder par artifices; ou mesme medicaments externes si les veilles estoient importunes. Enfin qu'on luy procure la tranquillité d'esprit en choses douteuses le recreant de grandes esperances.

Pour couronner au reste le present discours nous donnerons vn mot d'aduis touchant la preseruati-

ue, ſçauoir qu'icelle doit buter principalement au retranchement des cauſes tant diſpoſitiues que mouuantes. Et partant comme la grande repletion avec l'intemperie chaleureuſe du ſang és veines & viſceres tient le principal & premier rang és cauſes internes, & l'ardeur & ſeicheſſe de la conſtitution du temps és ſecondes, & mouuâtes, nous deuons nous eſtudier ſur tout tant à ce que le corps ſoit plus vuide que plein, & que la maſſe du ſang pareillemēt ſoit rafraichie; & comme la grande plenitude de ſang ſe deſcharge par ſaignée & purge, tous ceux qui de long-temps n'ont eſtés malades, & ont fait par cy deuant bonne chere, enfans ſans ſoucy, & ſur tout s'ils ſe trouuēt peſants, pleins & rubicundes, qu'ils ayent ſuſpecte leur ſanté trop fleuriffante iouxte l'aphoriſme del' Hippocrate Romain *qui nitidior eſt ſolito,*

suspecta debet habere sua bona. Celuy qui est trop poly, & vermeil, qu'il tienne pour suspecte ceste fleur de santé & partant hardiment vienne à la saignée apres vn clystere cōmun ou prinse de sirop de roses, & my-partisse la saignée, faisant ouurir en deux iours diuers les deux basiliques & tirant és deux fois vne liure de sang selō l'aage, & la plenitude des veines; & le lendemain prenne vne infusion de deux dragmes enuiron de rheubarbe dans la decoction de cichorée avec vn peu de sirop violat laxatif; & le pauvre & robuste, deux dragmes de *diaprunum* laxatif dissous dans du *purum* de laiēt, ou decoction de cichorée y adioustant vne once & demie de sirop de roses passes, ou de *polipodio*. Ce fait qu'ils s'estudient à rafraichir le sang, vsants des sallades, fruits tendres, exemple de cerises, damas, & semblables à l'entrée de table,

134 *Discours des fieures avec flux de vêtre.*
chairs, & poissons susmentionnez,
beuuant plus d'eau que de vin, com-
me aussi se baignant souuent en la ri-
uiere, & n'oubliant l'exercice mais
fort mediocre, & du matin, iettant
arriere toute aigreur & cuisans sou-
cis, & de iour cherchant la fraischeur,
& l'ombre, mais sur tout se tenant
couverts la nuit, & se munissant
contre les premieres froidures de
l'arriere-saison trauerfantes le mois
de Septembre, qui est la principale
caution en la precaution de nostre
maladie, laquelle plaise au bon Dieu
destourner par sa misericorde, se-
condant, & fauorisant nos petits ad-
uis que ie vouë avec tres-humble
action de graces à sa Maiesté & à la
conseruation & salut de mon pro-
chain.

F I N.